

ASO FARAILE, 15 MATI 2024

Na nofoia e le Fofoga Fetalai le Nofoa i le itula e 9:35 i le taeao.

Tatalo.

FOFOGA FETALAI: Ou te faasilasila atu ua toe amatalia nei Taulumaga a le Fono aoao Faitulafono.

TUUINA ATU O PEPA

Na tolaulauina e le Failautusi i le Fono Aoao le faasologa o Pepa e tusa ai ma T.T.49(2).

1. P.P.2023/2024, Nu.153, Lipoti Faaletausaga a le Matagaluega o Faatoaga ma Faiga Faiva mo le Tausaga Faaletupe 2021/2022.
2. P.P.2023/2024 Nu.154, Lipoti o le Usugafono a le Fofoga Fetalai & Sui Usufono i le Fonotaga mo Palemene o le Pasefika i Saina, 20-29 Novema 2023.

Ma le faaaloalo lau Afioga.

FOFOGA FETALAI: O le a tutaumua ia i le siupapa ae faataumata i muliauma ina ne'i folau mama'e le matagialuga ona po'ia lea o le aniva. O lea ua paega saasaa iu o le mulitofi ma atufofola foi le Siuamoauli ma le Laulafalafa ina ua tu le foe ma o'a pei o le tala i le malaga nai Sa-Vavau. Fo'i pea le faamanu ma le faaneetaga i le Atua, le Atua lava ua mafua ai le aso ua mafai ai ona toe fesilafai le paia o le Palemene i lenei taeao i le manuia ma le filemu.

Ou te ofo alofa ma faatalofa atu i le paia o le tatou Maota, i le afio o lau Afioga i le Taitai o le Malo lau Afioga i le Tamaitai Palemia. Afio lau Afioga i le Sui Palemia, afifio a outou Afioga i Minisita o le Kapeneta ae tainane a outou Afioga i Minisita Lagolago.

Afio foi lau Afioga i le Taitai o le Itu Agai, afio foi lau Afioga i le Sui Taitai ma Sui Usufono mamalu uma o le Palemene. Malo le soifua manuia ma le lagi e mama.

Le afifio mai o Ofisa Sili o Matagaluega ma Faalapotopotoga Tumaoti a le tatou Malo, faatalofa atu i lenei taeao, taeao manuia malo le usu.

Samoa i lau faafofoga tapuai mai i ou paia faalupelupeina, e i ai le talitonuga o lo o maua pea e le paia o le atunuu se folauga filemu i le faatasi mai pea o le

tatou Atua. Matou te faatalofa atu i lenei taeao fou, malo le lagi e mama, tapuai maia ma le manuia.

Le alofaiva o le Palemene i lenei aso, o le aso mulimuli foi lenei o galuega o lenei vaiaso tatou te manava foi i le itula e 12 i le aoauli. Agalelei le Alii i usugafono uma a le Palemene manuia le tapuaiga a le atunuu.

ILOILOGA O LIPOTI A KOMITI FAA-PALEMENE MA TALII A LE MALO

FOFOGA FETALAI: E tusa ai o le faasologa o Lipoti a Komiti Faa-Palemene ma Tali a le Malo o loo i le Pepa o Galuega, o Lipoti muamua e fa (4):

- 1. P.P.2022/2023 NU.91.**
- 2. P.P.2022/2023 NU.151.**
- 3. P.P.2023/2024 NU.1, ma le**
- 4. P.P.2023/2024 NU.2.**

faatasi ma Tali a le Malo na faagasolo le iloiloga i le aso fono ananafi ma ua faaauau i le taeao nei.

FOFOGA FETALAI: E tolopo Tualumaga o le aso fono ananafi ua maea saunoa le sui usufono o Vaimauga 1 ma ua maea ai foi i i sui usufono mamalu sa fia saunoa.

Ou te tapa lau Afioga i le Taitaifono o le Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae e te saunoa e talifuaitau.

Susuga Hon Tuilaepa Fatialofa Auelua Sailele Malielegaoi (Taitai o le Itu Agai): Lau Afioga i le Fofoga Fetalai...

FOFOGA FETALAI: Malie lau Afioga i le Taitaifono, se i tulai mai lau Afioga i le Taitai o le Itu Agai.

Susuga Hon TUILAEPA FATIALOFA AUJLUA SAILELE MALIELEGAOI: O au lea sa ou manatu ou te lauga i le mataupu, na o le pau le mataupu ou te fia lauga ai o le mataupu lea i le tatou Penisione. Ae ua vave uma le tatou fono ananafi e le i maua sou avanoa.

FOFOGA FETALAI: Ia lelei, o le avanoa lenei o lau Afioga i le Taitai o le Itu Agai.

Susuga Hon TUILAEPA FATIALOFA AUJLUA SAILELE MALIELEGAOI: Lau Afioga i le Fofoga Fetalai ou te faamalo atu i lau Afioga i le talosaga na siitia i lenei taeao e faafetaia ai le alofa ma le agalelei o le tatou Matai Sili, malupuipua pea Samoa mai le tele o mala i suiga o le tau ma o lea foi tatou te maitauina lava. E faapena foi ona faamalo i le tatou fonotaga nei le usufono i lenei vaiaso. Ia ae tainane foi le tapuaiga a Samoa i

ona tulaga faalupe faapea foi i auauna a le Atua ma le latou foi faanonogamanu ia ma tatou uso a Malo i Tutuila ma Manua.

Lau Afioga e taua tele fautuaga, faamalo foi i le Komiti ua aumai mo le toe tilotilo i le Penisione a outou po o tatou o sui usufono. E le i mama mafuaaga na faia ai le penisione lenei i le 1996 i faatalanoaga sa fai i totonu lava o le Vaega lenei ona o le maitauina pea talu mai ona Tutoatasi lo tatou Malo, o sui usufono o faatumutumuga ia o Itumalo i le mamalu ua to i ai o Tootoosinasina ma Tootouli o Itumalo e afio mai e auai, o le fofoga lea o itumalo aua le faalagamaea i le Maota nei i Tiafau o le Maota o le sailigamalo a Samoa.

O lea la ua to i ai le mamalu i le taimi na umia ai le tofi lau Afioga i le Fofoga Fetalai. Ona uma atu loa lea o le tofiga alu atu loa i tua e leai se mea e tua i ai. Na i ai le fesili na ave i le isi Toeaina sa faipule. O a au mea ia e fai nei lea faatoa uma lou Tofi? O le tali a le Toeaina, 'o lea ua saili se mea ou te ola ai i le fue ma le tootoo. Ou te usu i tai i Mulinuu e matamata po o a Faamasinoga ia e fai ona tu ai lea o lou tootoo. O le manatu, e mataga tele ia ituiga mea e tupu i Taitai o le Atunuu o le toe o toe aisi i tai i le Maota o le Faamasinoga. Ia, e le mamalu mo sui usufono.

O le ala lena na faamalositia ai le faiga lenei i le tausaga e 1996 ma o le ala foi lena na faataoto ai ma aiaiga ina ia malupuipua ai le seleni e tua i ai sui usufono.

Lau Afioga i le Fofoga Fetalai o le taua o le itu lenei, o le mea lava e tataua ona i ai, sa tataua lava ona faalupe, i le toe vaai lea i tua. O le NPF faapitoa a ui sui usufono. Ae ua tuu loa i ai le Penisione o i ina lea na tupu ai ma le faalavelave. Ua manatu le afaigaluega e ese le mea lea ese le NPF o lo o latou faafoeina, ae o le mea lava e tasi, tipi ese le vaegatupe mai i i, faaputu ave invest oo i le taimi e tala ai i tua, tala i tua. O le a la le mea lea e tupu? O le mea la lea o lea e taua tele ai fautuaga lea e aumai. E leai lava se mea e ese ai sui usufono ma latou uma o la e totogi NPF. O a tufatufaga e fai a le NPF ia aafia ai ma sui usufono.

O le mea foi lea ua ou faalogo iai, o le policy lea e alu ai tatou o la foi ua alu ai ma Faamasino. A o le a le mea lea e tupu? E maua faamanuiaga a Faamasino ae leai se mea a sui usufono e maua. E matua le talafeagai lea mea i Taitai o le atunuu o lea e faataoto atua ia Tulafono.

O le itu taua i le tulaga lea ua aumai ai le fautuaga, tuu i luga mai le 10sene i le 15. O lona uiga na o le 5 lava sene e faapoopo i ai ona avea ai lea 15sene mai \$1 taitasi o lo o e maua e aumai i totonu o le faaputugatupe lea. Ona o lea o le NPF e invest, e toe foi mai ua tele. O lea la e 10sene i le taimi nei mai \$1 taitasi. O le a le mea e mafai i lenei 5sene? E taua tele le avatu ma lea 5sene ia poo se isi foi 10sene, ae tele le manuia mo a outou Afioga i Sui Usufono i le taimi e litaea ai.

O le itu taua mo le silafia e le Maota lenei, e leai lava se employer e maumau sona taimi e manatu ai i mea faapea. Aisea? Aua o le a toe gau mai ai le latou 5sene aua e 15sene e tipi atu i lou totogi mai \$1 taitasi ma le 15sene e tipi mai lau afaigaluega. Mo tatou la, o le 15sene lea e sau lava i totonu o le tatou Malo, o se mea tataua. O le Maota lenei o lo o faafoefoe atu ai tupe a le atunuu ma le atinae a le atunuu ma e taua tele mo outou ia sui usufono e talavou, e toe omai,

omai, omai, omai pea. A o matou nei ua pulapula lagoto e le toe aoga i ai ia mea.

Lau Afioga i le Fofoga Fetalai o le taua lena mo outou sui usufono talavou lea ei totonu o le Maota lenei e toe omai, toe omai, toe omai. E oo ane i le taimi e te litaea ai ua lava le seleni e tuu i le loomatua e fai ai lou aso e valaau mai ai le Atua ia te oe ma tausii ai oe, fai ai mea a le aiga ma faalavelave.

Lau Afioga i le Fofoga Fetalai, e tua lelei le fautuaga lea ua aumai ma ou te le iloa foi pe tau fai ai se Tulafono Toe Teuteu po o ua lava le Regulation, Tulafono Faatonutonu. Ia pe lava a i le iuga e fai e le Komiti nai lo le tele o mea e felauai ae tasi lava le mea, e leai lava se mea e eseese ai ma le NPF lale e fai.

Lau Afioga i le Fofoga Fetalai e taua tele le itu lenei e faatumau ai le mamalu o le sui usufono. A alu atu nei le sui usufono faalupe, afio maia lau Afioga i le alii faipule, ua tutusa lelei lava oe ma King Charles i le ave i ai o le maualuga o le faaaloalo a le itumalo. Ma e taua tele le itu lea ua ou toe tulai atu ai ona o le mataupu lenei. E le o se mataupu na faatagafai na fai mo le puipuia o le mamalu o sui usufono o le Maota lenei. Manuia le tatou Fono.

FOFOGA FETALAI: Malo. Faafetai saunoa i lau Afioga i le Taitai o le Itu Agai aemaise foi le faatauaina o lenei Lipoti ma ana foi Fautuaga. Ia malo lava mo le sao o lau Afioga.

Ia se i tulai mai le sui usufono mo Falelatai ma Samatau, o lea ua tau faaiu le tatou... Tulai mai. E faigata foi le vaai atu i a outou Afioga i sui usufono mamalu.

Afioga LUPEMATASILA GALUMALEMANA TOLOGATA TOGIA TILE LEIA (Falelatai ma Samatau): Faafetai atu i lau Afioga ua maua se avanoa o lenei itumalo. E manatu o lea ua maea ona e toto le niu o le tuaoi aua lo tatou vatapuia ma lo tatou Tapaau Sili i le Lagi, ua maea foi ona e paepaeulufanua paia o le taeao ma le aso. E manatu la lenei sui o le a le toe oo i ai se matou tala.

Ae agai sao sa matou fautuaga ma se manatu o lenei itumalo ona o le taua o Lipoti a Komiti sa faafeagai ma le suesueina o Lipoti foi a Matagaluega e pei ona i luma o le Palemene. E agai se matou tala i le penisione a tagata matutua i tama ma tina matutua leaga o lea sa talanoa mai nisi o tama ma tina matutua o lenei itumalo. Ia nei faalogo mai e le o faaleoa lo latou manatu na aumai. O le manaoga o nai tama ma tina matutua, o taimi foi ia e tuua ai le atunuu e malaga i fafo. E le gata e o e asiiasi i nai fanau ma aiga a o avanoa foi ia e maua e o e siaki ai a latou fomai. Aepeitai a toe taliu mai i le atunuu e omai e leai ma se mea o maua i le penisione ua tipi motu lava le penisione i le taimi e tuua ai le atunuu. Ae i ai lo latou faamoemoe o nai seleni laiti ia e tua i ai pe a foi mai. E tau fesoasoani i pasese na o ai faapea foi pili a fomai i atunuu i fafo. O le mea lea e avatu ai le tuualalo a lenei itumalo se i toe silasila le Afioga i le Minisita ma le Matagaluega, e le o se tupe tele lea e maua e nai o tatou tagata matutua. Afai e tuua le atunuu i le 3 masina ia pe na o se \$900 se tupe o lea e vaavaai i ai e toe foi mai o la ua i totonu o le tusitupe. A o le tulaga lea i ai e foi mai e leai ma se mea. O le mea lea e faaleo atu ai manaoga o nai tama ma tina matutua.

Ia faapea foi i a latou talavai o lea sa ou vaavaai i le faatalatalanoaga a le Susuga i le Ofisa Sili o Pulega a le Matagaluega o le Soifua Maloloina ma e lagolagoina foi e lenei itumalo. O le tulaga lea i taimi foi ia e sioki ai talavai ia pe mafai ona faaauau pea le auaunaga lea e faatino e faletalavai tumaoti ae fai se feagaiga e mafai lava ona totogi atu e le tatou Faalapotopotoga o le NPF, nai lo le tulai mai o tulaga i le sioki o talavai e afaina tele ai nai o tatou tagata matutua. E pei na o le pau ia o nai fautuaga e tuu atu i lau Afioga. Faafetai tele mo le avanoa.

FOFOGA FETALAI: Ia malo faafetai, malo le sauna... oi ia se i tulai mai le sui usufono mo Aleipata Itupa i luga.

Afioga FUAAVA SULUIMALO AMATAGA (Aleipata Itupa i Luga): Ia faamolemole lava. Faafetai lava i lau Afioga mo le avanoa e puupuu lava le manatu o lenei itumalo.

FOFOGA FETALAI: Ia faafetai...

Afioga FUAAVA SULUIMALO AMATAGA: O lea ua laga e le sui usufono mo Falelatai ma Samatau le tulaga lea i penisione a tagata matutua. O le tulaga lea o lo o i ai i le mea lea agai iai e fai ni a latou siaki ma... ae foi mai ua tipi ese le latou penisione. Ua na o se faafesili lava, e le o apalaia le tulaga foi lele e pei lava ona fai foi i lalo o polices a le aufaigaluega a le Malo, a e mai e aumai lau pepa mai ia ona otometi lea na totogi oe.

Ae pei o si mea lenei afai o lea e o i fafo i le tulaga i sailiga fofu ma mea faapena ia e manino lava o lo o aumai se appointment ma se tulaga faapena ia na faamaoni ai laia ona totogi. Leaga ou te iloa o le mea lea i ai nei e aluese loa ma le atunuu taofi, ae talafeagai leaga o la foi e taumafai mai alo ma fanau i fafo e avatu matua e siaki foi e a latou fomai. A o si ona lave e foi mai ua le maua le tupe lea sa faamoemoe ai nai matua e fai ai le alofa o le faifeau ma mea faapena.

Ia ma le agaga faaaloalo, faafetai.

FOFOGA FETALAI: Malo sauna, faafetai... Ia lau Afioga i le Taitaifono se i tulai mai.

Afioga AUUAPAAU MULIPOLA ALOITAFUA MULIPOLA (Taitaifono o le Komiti o Tulafono Tumau, Faiga Palota, Talosaga ma Tofiga Faale-Faavae): E momoli le faafetai i lau Afioga i le Fofoga Fetalai. E manatu a o lea ua maea ona faalauatea paia o le taeao i le mamalu o le Maota nei aua foi le tatou utugataufa i le Atua ma Lona finagalo ua maea ai ona molimea i Faletui, ona o le agalelei o le Atua ua mafai ai foi ona toe faaauau galuega a le Palemene i lenei taeao.

Faafetai mo le avanoa, e faafetai foi i sui usufono sa laga finagalo i Lipoti e 2 a lenei Komiti, malo faafetai. Ia o galuega toe faaauau mai le aso ananafi e tusa

ai foi o finagalo na faaalua i Lipoti nei e 2, Lipoti a le Palemene, Penisione a le Palemene i le tausaga 2019/2020 le 2020/2021 ia ma le 2021/2022.

E manatu e 4 finagalo na faaalua. O le finagalo muamua, na faaalua le finagalo o Faleata 3 i le Penisione lenei ma lona mafuaaga. Na ona taua ai foi lea o le atuari po o se Konesale faapitoa na auai mai i Niu Sila e toe suesueina pasene o lo o tatou faaogaina i le Penisione nei a tagata matutua. E talu ai o Lipoti nei e 4 o lea sa faaali ai finagalo o le Maota Fono i le aso ananafi faaauau mai i le taeao lenei e toetoe lava a tutusa ona e aafia uma ai a le NPF ae o le a ou talanoa a latou i Lipoti e faatatau i le penisione a sui usufono o le Palemene. Na saunoa le sui usufono mo Faleata 3 pe le ua tataua ona fai ai se fuafuaga i le siitia ona o le... i le Lipoti o le 2021/2022, o lea ua aumai ai se fautuaga a le Konesale faapitoa lea mai Niu Sila ina ia siitia mai le pasene o lo o tatou I ai i le taimi nei i le 10% i le 17.3% o lea ua momoli atu ai i le Lipoti lea o le 2021/2022.

A o le Lipoti o le 2019/2020, 2020/2021 o lea sa avatu ai se fautuaga faale-Komiti pe le mafai ona sii i le 15, ae ona ua taunuu mai la le Konesale faapitoa lea i lona silafia i mea tau investments, o lea ua talosagaina i le 17.3 o le ala lea o le eseese o fuainumera ua matou avatu a o lea lava ua faaali ai le finagalo o le Afioga i le sui usufono mamalu mai Faleata 3. O le ala lea o le matou tuuina atu o le pasene e 17.3% lea.

I le sui usufono o le Vaimauga 1, sa faaalua muamua lona finagalo ia o lona finagalo foi lea sa faaalua i le Aso Lulu i se tasi o Lipoti foi a le Komiti lenei, o lo o ave lana faamamafa i le le saina o nisi o Komiti o Sui o le Komiti i le Lipoti. E pei foi ona ou fai atu ma faamalamalama atu o lo o taoto lelei lava le 166 o le Tulafono Tumau i ona Vaega uma. O Faiga Faavae a le Komiti lenei e faasolo le faatalanoaina o Lipoti. Ae i ai lava le taimi ma aso e faatulaga e saina uma ai sui usufono i le Lipoti lea. A oo atu la i le toe aso o le Lipoti ua le auai nisi sui usufono o le mafuaaga o malaga faale-Malo po o le gasegase, o le mafuaaga lena ae e le o i ai se lagona i sui usufono e ala ona le saina ona e i ai ni Vaega o le Lipoti e tetee i ai, o le ala lea o le le faia o se footnote pei ona fesiligia e le sui usufono lea. Ae o lo o malamalama lava i lalo o tatou Tulafono Tumau 166 (6), seivagana ua faaali se tetee o se sui o le Komiti ona faatoa fai lea i lalo o le footnote lea. O lona uiga afai e le o i ai, o lo o malilie uma lava le toa 9 o le Komiti i le tulaga lea ae pei o le tulaga lena ua mafua ai. O le isi foi vaega e le mafai ona matou toe tolo ina ia saina uma, leaga a faatu le lafo ina toe faalatele le taimi e aumai ai le Lipoti afai la e saina uma le Komiti nei, a o taeao faatu a o taeao lea e fai ai le Fono a le Palemene, e tataua lava na aumai le Lipoti fua i le faaupuga o le lafo ina ia toe faaumiumi se taimi. O le tali manino atu lea i le vaega lea e atugalua i ai le Vaimauga 1.

O le isi itu na taua e le sui usufono lava lea o le Vaimauga ia o le tulaga tau i le uili. O le fautuaga le e avatu ae na saunoa le sui usufono na faapea mai e pei a manatu le Komiti foi lele e fatonu atu le... Leai o le fautuaga lea e avatu ona e le natia e leai se isi e taupaleu'u ma le fingalo o le Atua i a outou Afioga. A ua faataoto lou finagalo po o fea le vaega o ai e ave i ai lea foi manuia pe a faapea o se tulaga faapena...

Susuga Hon Tuilaepa Fatialofa Auelua Sailele Malielegaoi: Lau Afioga i le Fofoga Fetalai o se mea e fia faasa’o...

FOFOGA FETALAI: Malie lau Afioga i le Taitaifono, se i tulai mai lau Afioga i le Taitai o le Itu Agai.

Susuga Hon Tuilaepa Fatialofa Auelua Sailele Malielegaoi: O lea ua ou faalogologo lelei atu i le tali mai a le Taitaifono. O ituaiga mea faapea se e faaoga i ai le tofamamao, common sense. Afai lava o lea e lava le taimi o le Palemene lenei... e le i taitai oo i le taimi, ia taumafai pea ia saina uma le Komiti. Leaga e i ai le uiga mataga o le le saina uma o outou pei tou te vaai mama i le Palemene lenei. E tatau lava la ona taumafai lau Afioga i le Taitaifono e maua le avanoa e saina uma ai le Komiti a o le i aumaia le Lipoti i totonu.

O lea lava e silafia e umi lava le taimi e aumai ai ma le taimi e faatalanoaina ai, na o se tuualalo.

FOFOGA FETALAI: Malo faafetai. Atonu o lea ua faafofoga mai le Taitaifono. Ia o fautuaga lava mo le agai i le lumanai aua lava le maopoopoga o tatou Lipoti ma le silafia e le tatou Maota. Ia tulai mai lau Afioga i le Taitaifono.

Afioga AUUAPAAU MULIPOLA ALOITAFUA MULIPOLA: Ia malo faafetai se i ou oo atu foi i le taimi e tali ai le faafesili ma le fautuaga a le Afioga i le Taitai o le Itu Agai, ae i le faaumaina o le finagalo a le Vaimauga o le tulaga tau uili, o lea ua avatu faafautuaga e pei lava ona matou avatu fautuaga o lea e aumai e le NPF, o lo o latou faatinoina le Penisione a tatou i le Palemene o lea foi ua matou avatu le fautuaga.

Ae afai lava e le finagalo le sui usufono ia e fai se uili, ia o lau lava faitalia saoloto lena i le tulaga lea. O le isi sui o le sui usufono o le matou Komiti e iu na talanoaina agai i o le NPF i Penisione a sui faisafoga, ia ae sa lavea lava le Komiti lenei i le saunoaga a le Sui Taitai ananafi ma ona toe avatu ai nisi vaega o lo o avatu i le Lipoti lenei...

Afioga Sulamanaia Fetaiai Tauilili Tuivasa (Vaimauga 1): Lau Afioga i le Fofoga Fetalai, ona o lea o le a see ese le Afioga i le Taitaifono...

FOFOGA FETALAI: Ia malie lau Afioga i le Taitaifono... se i tulai mai le sui usufono mo Vaimauga 1.

Afioga SULAMANAIA FETAIAI TAUILILI TUIVASA: Ia e faatalofa atu lenei itumalo i lenei taeao fou ua tatou aulia le aso mulimuli, ia o lo o galulue lava e ala i lo tatou valaauina. E momoli le agaga faafetai i lau Afioga i le Fofoga Fetalai, e faatalofa atu foi le Vaimauga i lena itu i le na tala na atoa i le afio o lau Afioga i le Tamaitai Palemia, le Sui Palemia, o alii ma tamaitai Minisita ma Minisita Lagolago. Ia liliu mai i lenei itu e faatalofa atu foi i le

Susuga i le Taitai o lenei Itu Agai aemaise foi le Sui Taitai ma lenei itu i sui usufono.

E momoli le agaga faafetai ona o lea ua afea e le Afioga i le Taitaifono le manatu o lenei itumalo, pei ona matou fai atu e momoli lava le agaga faafetai i le Komiti ona o le faamaeaina ma le lelei ona aumai o Lipoti. A o le sui usufono o le Vaimauga e pei o lea ua tali malamalama le Fofoga Fetalai i le tulaga lea o le saina. E pei ona ou fai atu a e maua lelei le fautuaga na avatu, e pei foi o lea na tau fesoasoani atu ai le Afioga i le Taitai o lenei itu, o mea uma e aumai i totonu o le Maota lenei, ina ia faapena ona mamalu ma aloaia aua e leai ma se mea o i ai se footnote e faapea na ala ona le saina faapea ua mamai pe gasegase pe ua malaga.

O lona uiga o le agaga o le itumalo lenei e alu aso sau aso e omai alo ma fanau, fesiligia o le a mea na le saina ai lou uncle o lou tama po o ai lea. O le popolega lea, ae eseese foi talitonuga lau Afioga i le Fofoga Fetalai i le 166 lenei e te taua mai. O le 166 o sui usufono ua le tetee pe i ai se finagalo i se Lipoti a o le manatu lava ia o le Vaimauga ia, leai o la e silent le tatou Tulafono mo saina i tatou Lipoti. Ia ae pei o lenei e tau tuli lava lou ai faapea o oe e ...e tatau na e fiafia o lea e avatu fautuaga o oe o le Sui Fofoga Fetalai e te fesoasoani ai i mea e aumai i totonu e aloaia, e matagofie, e maeaea uma. Ae a aumai la ni mea ae maitau atu e le o atoatoa aemaise a le saina e toa 3. O le a la le mea na le fai ai sau note i lalo? Na ala ona le saina sui usufono ia na mamai pe na i ai ni faanoia ae aumai lava. Ana le fesiligia nei la i le taeao lenei lea na 2... o ananafi le isi... pei o le agaga lenei lau Afioga i le Fofoga Fetalai e faataua ai e le sui usufono lenei, o le 166 na o ni Lipoti ua le maua ai ni finagalo tetee ona maua loa lea, a o le mea lea o le Lipoti lava ia a le Komiti...

FOFOGA FETALAI: Ia o lea ua maua...

Afioga SULAMANAIA FETAIAI TAUILIILI TUIVASA: E pei o le agaga lenei lau Afioga i le Fofoga Fetalai e faataua ai e le...

FOFOGA FETALAI: O lea ua maua, ua maua lou finagalo.

Afioga SULAMANAIA FETAIAI TAUILIILI TUIVASA: O lona lua o le uili leaga o lea ua toe taua ai foi le... pei sa i ai lava le manatu o lenei itumalo o lata ita a matafaioi lenei. E silent lava a o lea e pei o le a... ona e i ai nisi se i tulou e le manao e iloa e le loomatua lana uili, e i ai foi se isi o la e manao ai le toeaina ia... e faapena. A o lea o le a order mai e le Komiti pe faatonu mai e le Komiti le sui usufono, pei ona ou fai atu e faatoa fai lava le uili a le isi ina ua faalogo atu o le a oti nanei po o taeao.

E pei o le agaga lenei, o le matafaioi lava lenei a le sui usufono i lana ia matafaioi o le alu... po o ai e agavaa e fai ai lana uili. Ia manuia le Fonousu lau Afioga i le Fofoga Fetalai ma le mamalu o le Palemene.

FOFOGA FETALAI: Ia malo faafetai, malo le saunoa. Ou te talitonu o le mataupu lenei lau Afioga i le Taitaifono, o lea foi ua aumai timaiga ma tuualalo

ia atonu e aoga foi mo le agai i le lumanai ona e le o itiiti faatauaina o Lipoti e tuuina mai i le Palemene. Ia, o le mea lea, ia ou te fautua atu i lau Afioga i le Taitaifono, ia o tuualalo a sui usufono mamalu o le Palemene e aoga mo le lumanai. Ia, e i ai le manatu, ia e faapena ona... lea ua malamalama ma silafia. Ia, a o lea foi ua avatu le tuualalo a le tatou Maota ia ae aoga mo le lumanai.

Tulai mai lau Afioga i le Taitaifono.

Afioga AUUAPAAU MULIPOLA ALOITAFUA MULIPOLA: Malo faafetai i lau Afioga i le Fofoga Fetalai. Ia, o le a ou see ese ma le vaega lea leaga o lea ua e finagalo i ai. O le mataupu lava ia tau le uili, ia, Vaimauga muamua e, afai lava o lou finagalo e te le finagalo e faailoa ae o le finagalo lava ia o le Komiti e avatu faafautuaga. Ae afai o lou finagalo e te le finagalo e faailoa, ia, taoto atu i lou lea finagalo faitoatasi, a o le finagalo lea o le Komiti pei foi ona aumai ai le fautuaga a le NPF ia i tatou. Ia, lea ua ou avatu malamalama lava. E faapena le agaga lea e matou te avatu ia i matou. Ae o le ioe ia ma le leai, ia, o lo o i lou lava finagalo faitalia, le uili lea ua matou avatu faafautuaga. Matou te le o avatu foi i se tulaga faafaatonuga i le Palemene o se fautuaga e sosolo atu. E pei ona ou fai atu, ia, e au i le tauola au i le fagota. Tatou te le iloa le finagalo o le Atua.

O le sui usufono lona fa, ia, o le sui usufono lea o le Afioga i le Taitai o le Itu Agai. Ia faafetai mo fautuaga lea ua aumai. Ae pei ona ou faamalamalama atu, o le Komiti lava lena e faatoa saina a Lipoti i le taimi mulimuli ae le i aumai i le Palemene. Ona matou te faia uma le screening, o le wording ma mea uma lava. Ae afai la o I ai ni sui usufono o mamai i le taimi lena... po o ua le auai, ia paga lea ua leai so matou avanoa e aumai. A o lea lava e maua le tou avanoa i tulaga ia. E ui i lea, ia, e manatu o se tulaga e ono toe teuteu ai le Tulafono Tumau ina ia tuu la i lalo o le faaiuga lea. Ae ui o lea, ia, e avatu foi malu i puega i le tulaga lena lea ua matou manatu i ai. E le mafai ona matou o e saili mai i Savaii le sui o la e gasegase ae o taeao le fono a le Palemene ua fia saina le Lipoti i le aso. Ia, ma sui foi o loo tuua le atunuu ia ona o fuafuaga i fonotaga i le tulaga lea.

Ia e manatu na o le pau ia o sui usufono sa i ai o latou finagalo a o le aotelega ma le matou tuutuu atu faalaa tuvanu i le paia o le Palemene. Ia, o lo o i ai lava le Tulafono e ao ona tagofia ma fai ai suiga ma mulimulitaia ina ia mafai ona faatino le siitaga lea pe afai e finagalo ai le malo. E pei foi ona i ai le Tulafono Penisione a le Palemene i le 1998, Tulafono faatonutonu a le Penisione a le Palemene i le 2010 ia ma le Tulafono o le Puleaina o Tupe a le tatou Malo 2021. Ma le agaga faaaloalo. Faafetai tele i lau Afioga i le Fofoga Fetalai mo le avanoa e tali atu ai le Komiti e tusa ai foi o finagalo na faaalua i le taeao lena. Manuia le fono a le atunuu.

FOFOGA FETALAI: Malo saunoa, faafetai foi lea ua faamalamalama nisi o mataupu sa laga e sui usufono o le Maota. Ia, faafetai mo le galuega a la outou Komiti. Tulai mai lau Afioga i le Taitaifono o Tupe Maua ma Tupe Totogi.

Afioga FALEOMAVEGA TITIMAEA TAFUA (Taitaifono o le Komiti o Tupe Maua ma Tupe Totogi): Ia, faafetai mo le matou avanoa. E mua ona faatulou i le paia o le Maota i le afio i lau Afioga i le Taitai o le Malo, faapea le Afioga i le Sui Taitai ae a le mamalu o le Kapeneta, Minisita Lagolago ma lenei itu i le afio o le Afioga i le Taitai o le Itu Agai ma le Sui Taitai ae a sui usufono mamalu uma a le Palemene. Malo lava le tautua malo le lavapapale. O tulaga i vaega na fesiligia o lenei Komiti, i le na o le toalua lava e na fesiligia. Sa toafa ae peitai ane, o lea ua lavea mai isi vaega ia e toalua i tali a le Afioga i le Taitaifono na se i mavae atu nei.

Ia, lau Afioga i le Sui Taitai o le fesili na tuuina mai i tulaga o le progress o lo o i ai le tatou return on investment i kamupani a le... O le Lipoti lea na tuuina mai i faamaumauga ua tuuina mai Faalapotopotoga a le NPF e tusa ma le 23 pasene tupe faasili mai tupe o lo o faafaigaluega i nei kamupani i totonu o le 10 tausaga ua tuana'i seia tau mai le tausaga nei, le tausaga lea na se i mavae atu nei 2023.

O le fesili na tuuina mai e le Afioga i le sui usufono mamalu mai Falelatai ma Samatau, faapena ona faaopoopo i ai ma Aleipata Fale i Luga, e maua penisione a i latou e sii mai i fafo i totonu o le 3 masina pe a aumai lava mea masani... foi lea o... lipoti a le falemai ma faamaonia ona maua lea o le seleni. E maua le seleni i le vaega lea ma le agaga faaaloalo. O fautuaga na tuuina mai... O le tele o fautuaga na tuuina mai, malo faafetai mo fautuaga mo le Komiti mo le agai i luma. E momoli atu le faamalo ma le faafetai tele. Ia, agalelei mai laia o le Atua i toe taimi o totoe o lenei fonotaga. Faafetai mo le matou avanoa.

FOFOGA FETALAI: Malo saunoa i lau Afioga i le Taitaifono. Tulai mai lau Afioga i le Minisita... Ia, malie lava lau Afioga i le Minisita, se i tulai mai le sui usufono mo Falelatai ma Samatau.

Afioga Lupematasila Galumalemana Tologata Togia Tile Leia: E momoli atu le agaga faafetai i le Afioga i le Taitaifono mo le tali malamalama. Ia, o si vaega lea sa ou tulai atu ai o le faalautele foi lea i tagata matutua. O i latou e malaga i atunuu mamao e asiasi i fanau ma aiga, ae le o o e vaai se fomai faapitoa, ae latou te faaoagaina le taimi lea a o faimalaga i atunuu e mamao e o ai e vaai le fomai e siaki po o le a se tulaga o i ai le soifua maloloina, ae foi mai ua leai se penisione. A o le mea lea e tau maua atu seiloga e avatu pepa o la e alu e vaai se fomai ona mautinoa lea e maua le penisione. A o le talosaga lena a lenei itumalo, e faalauaitetele o ai lava le tagata matua e malaga i fafo i vaega ia pei ona ou taua, e tuuavanoa pea i ai ina ia maua pea lana penisione. Ma le agaga faaaloalo.

FOFOGA FETALAI: Tulai mai lau Afioga i le Taitaifono.

Afioga FALEOMAVEGA TITIMAEA TAFUA: O lea ua maua atu lou finagalo, faataatia mai lou finagalo. O le a... se i tilotilo i ai ma le agaga faaaloalo. Faafetai.

FOFOGA FETALAI: Ia, o le uso matua lava lea o taatia mai ae lafo atu i lau Afioga i le Taitaifono le talosaga a le sui usufono mamalu. Ia, tulai mai lau Afioga i le Minisita.

Afioga Hon LAUTIMUIA UELESE VAAI (Minisita o Tupe): Lau Afioga i le Fofoga Fetalai, ia e piiama foi ma aufaatasi i le taulaga molia e pei ona momoli ai foi lapalapa o malo i le taeao ua tuanai e lau Afioga i le Fofoga Fetalai, e sula le alofa ma le agalelei o le Atua i Lana pule faasoa i le momoli mai o lo outou soifua ma so matou ola ua tatou tafesilafai ai i manu i le fonousu a le Palemene i lenei taeao. Ou te tulai ai foi ma le faaaloalo tele vaeane le mamalu tauee o le Palemene, e ofo alofa ma faatalofa atu i lau Afioga i le Fofoga Fetalai, lau Afioga i le Tamaitai Palemia ma le Sui Palemia, afifio foi tou Afioga i Minisita o le Kapeneta, Sui Fofoga Fetalai ma Minisita Lagolago. E faapea foi lenei itu o le malu i le afio o le Afioga i le Taitai o le Itu Agai, Sui Taitai aemaise foi o sui usufono mamalu uma o lenei itu o le malu o lo o agaia le tatou Malo.

E faatalofa foi i Afioga i Ofisa Sili o Pulega o Matagaluega ma Faalapotopotoga o le tatou Malo. Malo le onosai mai i le tatou galuega. E le faagaloina le tapuaiga a Samoa i ona tulaga faalupea masani, mauga maualuluga ma mauga tetele ia e oo a i fatu tuloto faapea le aufaigaluega totofi a le Atua o lo o nonomanu aua le fono a le Palemene aemaise o le faigamalo a si o tatou atunuu.

Lau Afioga i le Fofoga Fetalai, e muai momoli le faafetai i sui usufono foi ma le mamalu o le Maota sa sausaunoa foi ma faaali finagalo e tusa ai o Lipoti na faataatia e Afioga i Taitaifono o le Maota.

Lau Afioga e talitonu le manatu ua manino auofala i tali foi pei ona talifuaitau i Afioga i Taitaifono i fesili sa fesiligia aemaise o mataupu sa laga e sui usufono mamalu. E tolu lava nai vaega ia lau Afioga e fia oo I ai se faamatalaga e talitonu e tatau ona oo i ai se tala a le Minisita mo le silafia e le Palemene aemaise foi o le faafogafoga tapuai mai a si tatou atunuu.

Muamua lau Afioga, na laga e sui usufono mamalu le tulaga lea i le siitia o le penisione a le Palemene, aemaise ni fetuunaiga talafeagai. Lau Afioga i le Fofoga Fetalai, e maua i faamaumauga e le fou le mataupu lea. Sa fautuaina foi e Komiti i Paeiga talu ai... e manino foi le Lipoti e pei ona faataatia mai e le Komiti le fautuaga lea, ma o le tali... maua foi i faamaumauga i tali i Paeiga ua tuanai, o lo, o faagasolo pea i ai galuega a le Malo e fua i le tamaoiga aemaise foi la o le faataatiaga o galuega e faagasolo, e fua i priorities a le Malo.

Ia, lau Afioga i le Fofoga Fetalai, lea foi ua maitauina ua maea ona faatino le study a le actuary po o le... e i ai le faufautua faapitoa e i ai le tomai faapitoa i vaega nei ma ua fautuaina ai foi le vaega lea, ma e faatauaina e le tatou Malo le vaega lea. O lea la lau Afioga, o le tali talu ai e faagasolosolo i ai galuega, a o le tali a le tatou faigamalo lea ua prioritize, ua toetiti lava oo i ai le tatou faagasologa.

Lau Afioga o le mataupu lona lua o le tulaga lea i le... faaali foi manatu o sui usufono mamalu i le tulaga o le tatou penisione a tagata matutua. O le... i se siitia po o se fetuunaiga talafeagai foi aemaise foi nisi o... o talosaga i le tulaga

o lo o i ai ai nei ni suiga e mafai ai ona fesoasoani i tatou tagata matutua, mamalu o tama ma tina matutua o si o tatou atunuu. Lau Afioga i le Fofoga Fetalai, o le galuega faifaiepa lava le mea lea i tausaga uma lava e silasila pea i ai le tatou faigamalo i le mea leni... i le faamanuiaga leni e ave i tatou tagata matutua e ala i le tatou polokalame leni o le penisione. O fetuunaiga foi talafeagai e tataua ona fai i le polokalame leni, e pei ona ou fai atu i lau Afioga i le Fofoga Fetalai e fu ai le tatou tamaoiga aemaise foi o suiga i le tatou tamaoiga ia aemaise foi o suiga i le tau o le soifuaga. E maitau mai lau Afioga i le Fofoga Fetalai o le 2021 lea sa fai ai foi le isi faaopopoga o le tatou penisione leni ina ua tulai mai le tatou faigamalo, lea na faaopopo ai le \$50 lea ua \$200 ai le penisione mo tagata matutua faatasi ma la faamanuiaga masani e ala i le tatou talavai aemaise ai foi la o feoaiga i vaa i le va o Upolu ma Savaii ia ma isi faamanuiaga lea la e faatupe uma e le tatou Malo. Ae ua faamauiina, ua faamauiina aua e iloiloia pea e le tatou faigamalo le vaega lea i tausaga uma, tausaga uma, tausaga uma. E silasila lelei i le mea lea i ni fetuunaiga talafeagai a o lea ua faamauiina ai foi le mea na sausaunoa i ai sui usufono aemaise lava i tulaga ia o le malaga i fafo o tatou tagata matutua ma le toe foi mai. Ia, o lea ua faamauiina mea ia e silasila i ai le tatou Komiti.

O le vaega lona tolu lau Afioga, lea sa fesiligia e... sausaunoa nisi o sui usufono mamalu i le tulaga lea o le i ai o officials i luga o le Board a le NPF. Lau Afioga i le Fofoga Fetalai, ou te manatu e taua le mataupu leni ma e tataua foi ona oo i ai se faamatalaga e faamanino i le faafofoga a le tatou Palemene aemaise le faafogafoga tapuai mai o le tatou atunuu aemaise foi le maitau mai o le tatou Faalapotopotoga. Lau Afioga, o le 2010 na suia ai le Tulafono a le NPF. O le suiga leni i le 2010, na pasia atu e le Palemene o lo o aiaia ai le toe i ai o se sui usufono a le Palemene po o se tagata faigaluega a le Malo - public servant po o se Constitutional Officer i luga o le board lea.

Lau Afioga i le Fofoga Fetalai, o le talosaga... o fautuaga ia na aumai e faapea e toe tuu i ai i le Board le Ofisa Sili o Pulega o le Matagaluega o Tupe, Failautusi o Tupe ma le Loia Sili. O le mea lea sa i ai, sui mai loa i le suiga lea ina ua sui le Tulafono i le 2010 lea la ua faatino ai e le tatou faigamalo le suiga lea.

Lau Afioga i le Fofoga Fetalai, o le mafaufauga ma le agaga i le vaai i ai i tua o le suiga leni e ese le manaia. O se suiga lelei, e pei o le agaga lea sa i ai i tua i le suiga lea o le Tulafono, o le tulaga foi lea ina ia tutoatasi, ia independent le Komiti Faafae po o le Board i le faatinoga o latou faaiuga faapisinisi, o le tulaga taua lava lea i le vaai i ai i le suiga lea. Lau Afioga i le Fofoga Fetalai, maitau foi so o se suiga lava e i ai foi ona faafitauli. Ma i le suiga foi lea ua sui ai le Tulafono, o lo o i ai foi le vaega o le Tulafono o lo o taoto mai ai e mafai e le Kapeneta ona faamaonia nisi suiga talafeagai, pe afai e i ai ni faaletonu e tulai mai i le suiga lea ua faatino nei ma o lea foi la... e pei o i la i le vaega lea, lea e auala mai ai le fautuaga lea.

Lau Afioga i le Fofoga Fetalai, o se mataupu e taua mo le malamalama aemaise le silasila pea i ai mo le agai i luma, e le gata i le Minisita o lo o patino i ai le Faalapotopotoga, ia e fua foi i ni fautuaga e tuuina atu i le Kapeneta mo ni suiga talafeagai mo le agai i luma.

Susuga Hon Tuilaepa Fatialofa Auelua Sailele Malielegaoi: Lau Afioga i le Fofoga Fetalai...

FOFOGA FETALAI: Malie lau Afioga i le Minisita, se i tulai mai lau Afioga i le Taitai o le Itu Agai.

Susuga Hon TUILAEPA FATIALOFA AUJELUA SAILELE MALIELEGAOI: E taua tele le vaega lea ua taunuu i ai le faamalamalamaga a le Minisita ina ia manino lelei suiga tetele nei sa fai ina ia aveese ai Minisita ma Ofisa Sili o Pulega o Matagaluega i le tulaga o le avefa ma Directors o le Board ae saofai ai pea le Ofisa Sili o le Pulega o le Matagaluega i le tulaga faafautua.

O le mafuaaga o le suiga lenei, o le tele o mau faitioga mo faaiuga fai e fai i luga o Komiti, aemaise lava la Komiti o le Faletupe ma le Komiti lea o le NPF. O le a lava se faaiuga e lelei, ae faitioina e faapea e polokikia ona o lea e saofai ai le Minisita.

E taua la le... manatua foi e i ai le faaupuga foi lele, e le gata ina e talitonu e faataunuu le amiotonu, a ia e faia ni gaoioiga e atagia atili ai se faaiuga amiotonu e le o aafia ai le tulaga o le aufai-polokiki po o le Minisita po o se Sui usufono. E taua tele le itu lea i le vaai mai foi a fafo latou o lo o sau ai seleni mo le atinae o Samoa. Ae o le mea tele lava sa faafitauli i le taimi lena o le fiafia o Minisita e saofafai ai i totonu o le Komiti ia ma le tele foi o isi Ofisa Sili o Pulega o Matagaluega ona e tetele latou alauni e maua mai ai. E le gata la o alauni a o Board Fees, ia e sau i luga i le tai fia afe ma ai le seleni a le Faalapotopotoga e tataua ona taofiofi mo ana fuafuaga mamao.

Ae sa i ai la le suiga faapea, o le a tofia se isi faapitoa mai fafo e aumai ai ni fautuaga i suiga o le a aumai i totonu aua e le faigofie le mea lea o le tuu i totonu o Sui o Komiti. Aisea? O Minisita uma lava lea ia e i ai e manao lava e aumai latou tagata, e aumai latou tagata i totonu ma atili polokikia ai faaiuga fai ma atili sese ai faaiuga fai. E mama la le iuga, a o lea la e faavae i luga o le tulaga lenei, o latou uma lava ia o le a aumai i totonu i le taumafaiga ina ia tonu ma sao faaiuga, e le fai mea piopio, e amata mai lava i le Taitaifono. O le ala lena e taua tele ai le i ai o le Ofisa Sili o le Matagaluega ae faaeteete tele i le soona avatu o tagata i fafo.

Ia, lau Afioga i le Fofoga Fetalai e le natia o lea tatou te i le lalolagi, a tatou i le lalolagi o le matua tele o tiapolo e fealua i ai.

FOFOGA FETALAI: O lea ua maua lou finagalo.

Susuga Hon TUILAEPA FATIALOFA AUJELUA SAILELE MALIELEGAOI: Lau Afioga i le Fofoga Fetalai, o le agaga atoa e sao, saolele lava le faasilasilaga lea e aumai e le Minisita. A o mafuaaga taua la na ona e i ai le itu lenei, o i ina tonu lava na atili ai ona tele tatou seleni na maua mai ona o le fiafia o Faalapotopotoga i fafo ua agai i luga le tauleleia o Samoa i le mea lea o le fai o faaiuga e manino ma mautinoa e leai se uiga faaalualua o lo o i ai.

FOFOGA FETALAI: Malo faafetai. Tulai mai lau Afioga i le sui usufono mo Faleata 3.

Tofa LEALALEPULE RIMONI AIAFI (Faleata 3): Faafetai. O lea ua saunoa le Taitai o lenei Itu i nisi o vaega. E momoli le faafetai i lau Afioga i le Minisita, ia leai e le tau selu atu o lea e lava lou silafia i mea nei, e tolusefulu tausaga o e galue i le Malo.

O le mea muamua lea i le tatou Penisione, lea ua e saunoa o le a faatino. Faafetai. E pei ona ou faamamafa i lau faamatalaga ananafi e le mafai ona soona sii e tatou e aunoa ma ni mafuaaga tata, justifications. O lea la ua talitonu lau Afioga o lenei ua i ina justifications aua o lea ua si'i e le Malo. E faigata le faaiuga a le Malo talu ai i le siiga o le NPF a tagata i le 10%, e le i faigofie leaga na le fiafia ai le aufaipisinisi ae na fai lava e le Malo talu ai mo tagata lautele ia manuia. Ou te talitonu o le taimi foi la lenei o tatou, o lea e sosolo lava i faiga faavae, ae faafetai o lea ua e saunoa o le a faataunuu.

O lona lua e sao lelei lau Afioga i le suiina o le Tulafono lea a le NPF. O le taimi o le 2002, 2003 na amata ai ona faatalanoa e le ADB mea tonu a i suiga nei pei ona saunoa le Afioga i le Taitai. O le taimi lea o ou tauavea le malaevaalele, na aumai ai loa lea ma ituaiga mea ia na omai ma latou ina ia sui, aveese Minisita mai Taitaifono o Boards. Na matua faaali lava lou tete'e i totonu o talanoaga nei, consultations ia na fai, na ou fai i ai e ese lava atunuu a outou ese foi Samoa latou ma faiga o lana ia Faigamalo. E i ai mafuaaga aua o le a ono aafia ai, feteenai ai le Minisita e ou le Matagaluega ia ma le Taitaifono. Na ou o'o mai loa i le Palemene i le 2006 ae aumai loa ma le Tulafono e sui ai Taitaifono aveese Minisita.

O lenei e silafia, lenei e mau i record. E le i fiafia ai foi le matou Opposition i le taimi lenei, aua ua fiafia uma lava o le a aveese Minisita. A o au lava na ou tu i luga ma ou fai atu, ou te le auai, ou te le taliaina. Mo le faafaigofieina o le faiga o galuega a le Malo, ou te talitonu au ia a faaletonu o le Minisita a lelei o le Minisita. O lea la ua i ai nei, aua a faaletonu e amo uma lava e le Minisita. A oo foi la ina aumai Lipoti lea tatou te talanoaina i inei e le tali ai le Taitaifono na o le Minisita. Ae ui i lea ua pasia le Tulafono ia lea ua tatou alu ai. O lea la ou te maua leaga o lea ou faalogologo foi, lea e afifio atu Minisita sa i ai talu ai aua e i ai lava le feteenaiga lea, o Taitaifono ma Minisita. Ia ae peitai ane, afai o le tulaga lea o lea ua alu ai, na o le vaai mai fafo mo le transparency lava lea ma le good governance. Aua e pei ona saunoa le Afioga i le Minisita, lelei, saunoa le Taitai, intentions lelei ia. Ae a sese loa le tagata e tuu i ai, ona faaletonu loa lea.

O le uiga o le faamatalaga lau Afioga, pei ona fai atu ananafi, na silafia e le Kapeneta talu ai, e pule le Kapeneta e oo lava i le taimi nei. O le faitalia o le Taitaifono o le Kapeneta, ae na tuu lava i ai e le Kapeneta le Minisita... le Pule o le Finance e eseese SOE ma le NPF. O SOE a le Malo o tupe a le Malo, o le NPF o tupe a tagata o le atunuu, tupe a tagata o le atunuu. O le mafuaaga lea na fai ai le faaiuga a le Kapeneta talu ai ma le Taitai o lenei itu, tuu ai pea le Failautusi o Tupe ia saogalemu tupe a tagata lautele, lea la e i ai le Lipoti lea tatou te talanoaina nei.

Ma ou te fautuaina lau Afioga i le Minisita ona o lea ou te talitonu na i ai le opinion a le Afioga i le Loia Sili lea e i ai nei sa fai i le mataupu lea ina ua feteenai, ia ae tagai pea i ai. O lea ua taatia atu, taatia atu i lau Afioga o lea ua tatou vaavaai i le tulaga lea ua i ai nei ua tatau ma talafeagai ona fai se faaiuga e puipuia ai oe ma le Malo aemaise o tupe a tagata lautele. Ma le faaaloalo lava, faafetai.

FOFOGA FETALAI: Tulai mai lau Afioga i le Minisita e faaauau le saunoaga.

Afioga Hon LAUTIMUIA UELESE VAAI: Faafetai i lau Afioga i le Fofoga Fetalai. Ia e faamauina foi le agaga faafetai i le saunoaga a le Afioga i le Taitai o le Itu Agai, aemaise foi le saunoaga faamalamalama a le uso a sui usufono mai Faleata 3. Ou te talitonu lau Afioga i le Fofoga Fetalai ua atili malamalama ai lau tali i saunoaga a le Afioga i le Taitai o le Itu Agai aemaise foi le... Ia ua maea ai foi ma fautuaga foi e pei ona tuuina mai, ua faamauina lelei fautuaga ua tuuina mai.

E faaleoina ai le agaga faafetai i le Komiti aemaise o Afioga i Taitaifono e tusa ai foi ma le galuega maeaea i Lipoti pei ona faataoto mai i le tatou Maota, e faigofie ai foi le galuega a le Minisita.

E faaleoina le agaga faafetai i le Faalapotopotoga a le NPF, lau Afioga i le Tamaitai Pulega, Pulega aemaise le aufaigaluega, malo le galulue malo lototetele, aua tatou te loto vaivai, e le iloa se tautai i ni tai malu. O le mea lea lototetele, faamoemoe i le Atua e faasino mai le mea tonu ma le moni e tatau ona tatou faia.

Ia manuia le saofaiga a Ofisa Sili o Pulega, faafetai tele i lau Afioga i le Fofoga Fetalai mo le avanoa. Manuia le tapuaiga a Samoa, manuia le Fono. Faafetai.

FOFOGA FETALAI: Malo faafetai. Malo saunoa i lau Afioga i le Minisita, ia o lea ua manino mea uma aemaise foi o nisi o mataupu sa laga e sui usufono mamalu o le Maota, ia malo lava galue. Faafetai foi mo le faamalamalamaga.

Tulai mai le Afioga i le Taitaifono o le Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae mo le lafo.

Afioga AUUPAAU MULIPOLA ALOITAFUA MULIPOLA: Lau Afioga i le Fofoga Fetalai ou te faatu le lafo; *Ina ia faamaonia e le Fono Aoa Lipoti e lua a lenei Komiti e pei ona iloiloina:-*

1. P.P.2022/2023 Nu.91.
2. P.P.2022/2023 Nu.151.

Faaluaina e le sui usufono mo Lefaga ma Faleaseela ma le sui usufono mo Gagaifomauga 2.

Na faamaonia le Lafo.

FOFOGA FETALAI: Ou te tapa lau Afioga i le Taitaifono o le Komiti o Tupe Maua ma Tupe Totogi mo le lafo.

Afioga FALEOMAVAEGA TITIMAEA TAFUA: Lau Afioga i le Fofoga Fetalai ou te faatu le lafo, *Ina ia faamaonia e le Fono Aoao Lipoti e lua a lenei Komiti e pei ona iloiloina:-*

1. *P.P.2023/2024 Nu.1.*
2. *P.P.2023/2024 Nu.2.*

Ma le faaloalo lava.

Faaluaina e le sui usufono mai Lefaga ma Faleaseela, sui usufono mo Gagaifomauga 2 ma le sui usufono mo Aana Alofi 2.

Na faamaonia le Lafo.

FOFOGA FETALAI: Ou te tapa lau Afioga i le Minisita mo le Lafo.

Afioga Hon LAUTIMUIA UELESE VAAI: Lau Afioga i le Fofoga Fetalai, ou te faatu le lafo, *Ina ia faamaonia e le Fono Aoao Tali a le Malo i Fautuaga a le Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae ma le Komiti o Tupe Maua ma Tupe Totogi.*

Faaluaina e le Minisita mo Taaloga ma Alagaoa mo le Fiafia o Tagata, Minisita mo Punaoa Faalenatura ma le Siosiomaga ma le Minisita mo Fesootaiga ma Faamatalaga Tekonolosi.

Na faamaonia le Lafo.

FOFOGA FETALAI: E momoli le faafetai a le Nofoa i tatou Lipoti ia ua tuanai atu, ona o lea foi ua tatou oo mai i le tatou taimi malolo leaga o le Aso Faraile leni ua vave malolo ai foi le tatou galuega. Toe valu lava tatou Lipoti ia e totoe ia ona maea loa lea o le tatou fonotaga. Ua faataatiaese Galuega a le Fono Aoao mo lana malologa masani o le taeao.

Na faataatiaese Taualumaga a le Fono Aoao Faitulafono mo lana malologa masani i le itula e 10.33 i le taeao ma toe faaauau i le itula e 11:02 i le taeao.

FOFOGA FETALAI: Ou te faasilasila atu ua toe amatalia nei Taualumaga a le Fono Aoao Faitulafono.

Ou te tapa lau Afioga i le Tamaitai Palemia mo le Lafo.

LAFO MO LE SUIA O ITULA FONO

Afioga Hon FIAME NAOMI MATAAFA (Palemia): Lau Afioga i le Fofoga Fetalai o lea ua maea paleauau le taliga o le sua i le paia o le Palemene e ala i le taumafataga o le taeao sa alo atu i ai. E i ai foi le manatu ua maua se faasiligamalosi e faaauau ai le tatou galuega, tatou te faafetaia faatasi ai le alofa o le Atua e ala i Lana foai.

Ua matau lava i le manaia o le gasologa o le tatou Iloiloga lea o lo o faagasolo nei, a silasila foi i le Pepa o Galuega e le o toe tele ni Lipoti ma Tali a le Malo o lo o totoe. E i ai le manatu e lelei foi ae tatou faaauau pea e faamaea, ona o galuega o tausaga ua leva ona tuanai, a o lea faatoa oo i ai le tatou iloiloga. Ma o le ala lea o le tulai atu ma le faaalo e faatu le lafo e faapea, *Ina ia faataatiaese Tulafono Tumau 32 mo le Suia o a tatou Itula Fono mo le aso fono lenei e faapea, pe afai e ta le itula e 12 i le tutonu o le la e le i maea le iloiloga o Lipoti a Komiti ma Tali a le Malo o lo o i le Pepa o Galuega, ona faaauau pea lea o a tatou iloiloga. Pe afai e ta le itula e 1 i le aoauli e le i maea lava ona tatou tolopo ai lea mo le aso fono lenei.*

O le lafo lea ma le faaaloalo lau Afioga.

Faaluaina e le Sui Palemia ma le Minisita mo Faatoaga ma Faiga Faiva.

Na faamaonia le lafo.

FOFOGA FETALAI: Ia o le a faapea lava ona faagasolo le tatou galuega e le o toe tele ni a tatou Lipoti o totoe.

P.P.2022/2023 Nu.105, LIPOTI A LE KOMITI O LE VAEGA TAU LE VA FEALOA I LE P.P.2022/2023 NU.26, LIPOTI FAALETAUSAGA A LE FAALAPOTOPOTOGA O TAU MO FAALAVELAVE FAAFUASEI MO LE TAUSAGA FAALETUPE 2020/2021 - ILOILOGA

P.P. 2023/2024 NU.34, TALII A LE MALO I LE P.P. 2022/2023 NU.105.

FOFOGA FETALAI: Tulai mai lau Afioga i le Taitaifono o le Komiti o le Vaega Tau le Va Fealoai.

Tofa ALE VENA ALE (Taitaifono o le Komiti o le Vaega Tau le Va Fealoai): Ou te ofo alofa atu i lau Afioga i le Fofoga Fetalai i lenei taeao, soifua manuia. Ae faapea foi le alaalatai o le paia maualuga o le Palemene i ona tulaga taualoa, le faafogafoga tapuai mai a le tatou atunuu aemaise le aufaitatalo. Ia malo le soifua manuia i lenei taeao.

Ua ou tulai atu ma le faaaloalo tele e faatu le lafo, *Ina ia faautagia e le Fono Aoao Faitulafono le Lipoti a le Komiti o le Vaega Tau le Va Fealoai o lo o tuuina atu ai ana Sailiiliga, Fautuaga ma Iugafono.*

Ma le faaaloalo lava.

Na faaluaina e le sui usufono mamalu mo Lefaga ma Faleaseela, sui usufono mo Aana Alofi 3 ma le sui usufono mo Faasaleleaga 2.

Na faamaonia le lafo.

FOFOGA FETALAI: Ou te...se i tulai mai lau Afioga le sui usufono mamalu o Aana Alofa 3.

Afioga Agaseata Valelio Tanuvasa Peto (Aana Alofi 3): Lau Afioga i le Fofoga Fetalai e faasa'o o Aana Alofi 3. Ia ma le agaga faaaloalo.

FOFOGA FETALAI: Ia faafetai mo le faamanatu mai. Ou te tapa lau Afioga i le Tamaitai Palemia mo le Sui Minisita.

Afioga Hon FIAME NAOMI MATAAFA: Lau Afioga i le Fofoga Fetalai, ou te faatu le lafo, *Ina ia faautagia e le Fono Aoaio Faitulafono Tali a le Malo e faatatau i Fautuaga a le Komiti o le Vaega Tau le Va Fealoai.*

Faaluaina e le Sui Palemia.

Na faamaonia le lafo.

FOFOGA FETALAI: O lea ua maea faautagia le Lipoti a le Komiti faapea foi Tali a le Malo i Fautuaga a le Komiti. Ia o le avanoa leni mo se tasi o sui usufono mamalu o le Maota.

Tulai mai lau Afioga i le Taitai o le Itu Agai.

Susuga Hon TUILAEPA FATIALOFA AUJELUA SAILELE MALIELEGAOI: Lau afioga i le Fofoga Fetalai ou te tulai atu ma le agaga faaaloalo e momoli atu le faamalo e tusa ai foi o le faasiligamalosi a lau Matagaluega aua le soifua lelei o tatou sui usufono nei. Ou te fia tautala i le taua tele o le Lipoti leni ua taoto i le tatou Laulau a Fono.

Lau Afioga i le Fofoga Fetalai, e taua tele ma ou te lagolagoina le galuega o fautuaga a le Komiti ae i ai nai tuualalo e silasila totoa pea i galuega faaopoopo ia ua faatulai mai e fesoasoani mai ai le tatou Faalapotopotoga o Tau mo Faalavelave Faafuasei. Ae ia aua ne i aveesea ai le mea leni o le silasila totoa ia malupuipua teugatupe a le Faalapotopotoga ina ia lava le tali atu i faalavelave e tutupu faafuasei.

Po o le a le tele o seleni o lo o i ai nei ae a tupu mai le faalavelave e aafia ai le toaselau o tatou tagata, e le taitai lava le teugatupe o lo o i ai nei. O le taimi nei o le fesuaiga o le tau o le mala pito maoae lea e tusa ai ma faaiuga fai a Taitai o le lalolagi, a... I le lalolagi i fesuaiga o le tau e ono tulai mai ai ni faalavelave faafuasei e aafia ai le toatele. E pei ona silafia i aafiaga o mea tau tupe.

Lau Afioga i le Fofoga Fetalai ma le nofo tapena mamao o le ACC, na ona ou faatepa o finagalo o le Maota leni i mea ia e tutupu i atunuu i fafo. Na tulai mai le mafuie gotouga i lalo se fale fogafale pe a ma le 100 fogafale, goto a

goto i lalo, feoti uma ai ma le fia afe ma afe o tagata e le i tupu i Samoa le mea lena. A o lea tatou te faafeagai ma faalavelave ia e tutupu i fafo. E lua ituaiga auala faainisia lau Afioga, o lea e fausia ai fale e le gata i Samoa nei a o fafo. E fau i le tulaga o le tietie o fale i luga o pou tetele ae tietie pou tetele na i luga o papa, papa tu o lo o i lalo o le eleele .Afai e leai se papa tu ona fau loa lea i le fausaga e faaopeopea. E pei o le tulaga foi lele lea e masani ona... le masani ai tatou o e fagogota i le fanamemei ma le matatao. Afai a latou lama e o ta mai o latou vaa e ta mai mosooi, na o laau lava faalalava e faalalava ai ma isi laau i luga tuu ai loa i luga ma le moli penisini, tuu ai luga ma le apa e tuu ai i'a e float e opeopea e le mafai ona magoto. O le faiga faainisia lena o lea e fau ai fale o le lalolagi. I le 9 o o'u tausaga sa matua matou tigaina ai tamaiti aoga e ta i lalo pou tetele o le fogafale 3 lale o Malisi. E te tuai atu loa, e faapenei le tetele o pou o isi pou e maualuga, o isi pou e maualalo ae tui a i lalo o lea ua tau i le papa, e le mafai lava la ona malepe le fogafale 3 le la. Ae faapefea le tatou fogafale lele 6 a le Malo? E leai ni papa o tutu i lalo e le i fausia la i le ituaiga faiga lea, e fausia i le tulaga o le faaopeopea. Ua fia mafuie na o le opeopea lava o le fale e le magoto ae le mafai na tatou iloa, lele na tau taofi ai ma le fogafale 6 lele o le faletupe e malamalama tele i ai le sui usufono lea o lo o alaala mai na fausia. Fai taofi, fai taofi, aisea? Leaga e i ai vaega e tui atu le pou alu atu a tomo i lalo e leai se papa, e i ai vaega na i ai le papa. Ae lau Afioga i le Fofoga Fetalai, o le tulaga lena, a agi la le mafuie e feseetai faapenei le fale na fai i le faiga faaopeopea. Ae faapefea le fale na fai e taula i pou tetele ia? Na ona taei a o papa tu la e i ai magoto uma i lalo le fale, e tele mea faapena ua tutupu.

E i ai le aualalapapa tele lava le auala savali na fai i Italia po o le 3 tausaga talu ai, e le i umi lava ona faaulufale ae agi le mafuie pau mai lalo e o'o i auala tetele e alu i luga i LA i le tausaga 1989, 1989. Ou te savali mai fafo mai Manila sa ou alu e faatalanoa le tatou Programme Loan na tatala mai le 1990, ae oso loa le mafuie lea, pauu uma a malepelepe uma a ia auala tetele ia fau i le sima, aisea? O lona uiga e le i lelei le fausia. O Amerika e i ai uma inisia maoae ma tusiata maoae, a o le a le mea lea na tupu? Turkey ma atunuu uma i South America. E tele fale faapena ua collapse a o lea tatou te tilotilo atu i ai. E magoto ifo lava le fogafale selau feoti uma tagata. Afai la e toaselau tagata pe tupu se faalavelave i i se fale o fale ia pe faaletonu le tatou lifi lea e alu i luga i le tele taimi ae faaletonu ai ae palasi le mea lena i lalo ae toa-10 tagata ia e i ai e leai se isi e ola.

Lau Afioga i le Fofoga Fetalai, o le tulaga lena. E tatou te le faalogologo tele foi i nei mea o insure. Ua fia ea ni insure e fai mo tatou tagata, mo fale ma mea faapena, ae oo i le taimi e tapa ai le insure ae fai mai le insure se i tilotilo ifo lava i lalo i le tamai upu lena e i tua ane o... Ae tilotilo atu, e le totogia e le insure lena se faalavelave e tupu faafuasei a o lea ua lauiloa lapataiga ua fai ma lamatiaga o le fale ua uma lava na lauiloa e le totogia e le insure, ua fia ni mea faapena e tutupu. E o atu e tapa ae fai mai le insure e le o se matou mea leaga o na e i ai le condition i tua e masani ona le tilotilo i ai le toatele. Lau Afioga i le Fofoga Fetalai ia o le tuualalo...

FOFOGA FETALAI: Ia faafetai...

Susuga Hon TUILAEPA FATIALOFA AUUELUA SAILELE MALIELEGAOI: O le tuualalo ae taua tele le galuega ma ou te faamalo i le Tamaitai Pule o lo o tauavea le Matagaluega lenei faapea foi ma le latou aufaigaluega ma e foi sa i ai muamua i le faamaoti ma faamalumalu pea i le teugatupe lenei ona e tele le aoga i taimi e ono tulai mai ai ni pefea i lo tatou atunuu.

Lau Afioga i le Fofoga Fetalai o le sao lena i lenei taeao.

FOFOGA FETALAI: Ia malo le saunoa i lau Afioga i le Taitai o le Itu Agai. Ou te iloa ua taaofai uma lava o outou finagalo i le saunoaga a le Taitai o le Itu Agai. Ia, tulai mai lau afioga i... Oi lau Afioga i le Sui Taitai e i ai se mea ua e... ia...

Tofa Hon LAUOFO FONOTOE NUAFESILI PIERRE LAUOFO (Anoamaa 2): Ia lau Afioga i le Fofoga Fetalai o nai vaega laiti ia e tusa ai ma Lipoti a le Afioga i le Taitaifono ma le Komiti...

FOFOGA FETALAI: Ia saunoa lau Afioga.

Tofa Hon LAUOFO FONOTOE NUAFESILI PIERRE LAUOFO: Na ona ou fia pa'i lava i ai ae manatu foi i le tatou aso ma le tulaga o le faagasologa o le tatou galuega. Ae faafetai mo le avanoa. O lea ou te maitau atu i fuainumera ia e aumai le Lipoti e fai lava se toatele o latou ua maliliu i faalavelave faafuasei, i latou ia ua talosaga e latou aiga le fesoasoani i tulaga o latou manunua faapea foi latou ua maliliu.

O lea la ou te vaaavai atu i fuainumera o le Lipoti a le Komiti e 31 latou manunua ae 25 latou ua maliliu. O lona uiga e fai lava si maualuga o le fuainumera lea o latou ia e aafia i faalavelave tau le auala. O lona uiga o taavale afi. E maoae ia fuainumera pe a fua i le tulaga o i ai le tatou atunuu ma le faitauaofai o tagata. O lona uiga e tele le galuega o lo o manaomia e galulue faatasi ai le Matagaluega faapea foi isi lala o le tatou Malo, e pei o le Ofisa o Leoleo ma le LTA ma isi foi Matagaluega faapena. E oo foi la i tagata o lo o manunua i totonu o galuega, o lea ou te maitau atu i le fuainumera e 94 i latou sa manunua. E talosagaina foi fesoasoani mai le tatou ACC ae toalua i latou na maliliu mai falefaigaluega. O lona uiga e fai lava sina maoae o fuainumera nei i lau maitau ma lau vaai i ai. E tatau ai la ona faamalositia. A o se tuualalo i le tatou Matagaluega ia galulue faapaaga ma le tele o isi Matagaluega e pei foi la o le vaega lea o le MCIL i tulaga tau occupational safety mo le saogalemu i falefaigaluega ona e fai si maoae, e faapea foi le tatou Maota Gasegase i le falemai, le Tineimu ma i latou uma na e tatau ona galulue faatasi ina ia taumafai e tuuitiitia ia faalavelave e tulai mai luga o aualatetele e aafia ai soifua faapea foi tagata faigaluega.

O le tatou Maketi i Fugalei o lo o i lalo o le ACC ae faamalo faafetai i galuega ia o maitau atu o lo o faagasolo lelei lava tulaga o le faatinoina o lea foi atiunae

a le tatou Malo. A o le fautuaga ma le tuualalo o tulaga e tapenapena aua le tatou taligamalo, e lelei lava le toe tapena lelei ma faamama tulaga uma aua o le tele o isi tagata ia o le a omai i le tatou taligamalo pe usufono mai, e pei o isi e fiafia e o asiiasi i tulaga tau Maketi e silasila foi i a tatou faaeleeleaga faapea foi fua o faatoaga. E taua tele la le vaega lea i lou taofi, ae momoli atu ai le faamalo foi i le tatou Pulega faapea le aufaigaluega. O le faamanuiaga ia o tagata faigaluega ua manunua pe maliliu, o lea e manino le Tulafono a le ACC po o le Faalapotopotoga, e afua mai le aso e te malolo litaea ai e faitau mai le 6 masina, a maea loa le 6 masina le toe agavaa loa oe i faamanuiaga nei.

Ae i ai la i latou sa galulue i lo latou soifuaga atoa galulue, e le i talosaga e latou ona e le i faamanualia pe na afaina i galuega ae o lea o le a faamuta ai i i o latou foi agavaa i ia faamanuiaga. E taua la le manatu faatu mai o le Lipoti, o le a se tofa ae se i silasila le Pulega ma le Matagaluega po o le Afioga i le Minisita, i latou ia e malolo litaea pe mafai ona faaaau le latou foi faamanuiaga se i oo lava i le taimi e maliu ai ona e tele tausaga o galue ma tipi atu le saofaga po o le tupe lea e 1% mai lona totogi agai le Matagaluega ae le i aoga lava ia ia ona e le i aafia ia i se manua po o se faalavelave.

O nai vaega ia lau Afioga i le Fofoga Fetalai ae faafetai mo le avanoa.

FOFOGA FETALAI: Malo faafetai, ia tulai mai le sui usufono mo Vaimauga1.

Afioga SULAMANAIA FETAIAI TAUILIILI TUIVASA: Lau Afioga i le Fofoga Fetalai e momoli le agaga faafetai ua maea foi ona paleauu le taliga o le sua i le paia o lenei Maota. Ae tulai ma le faaaloalo ona o le taua o le Lipoti a le Komiti. E faamalo atu ai lau Afioga i le Taitaifono, ua toe foi lau Afioga e taitaiina lenei Komiti matagofie.

O nai fautuaga ona o le vaega muamua o lo o fautua mai ai le Komiti ina ia toe iloilo foi tulaga i faiga faavae o Tulafono mo e agavaa. O le popolega o le sui usufono, e pei o lea e talosaga le Komiti i tagata faigaluega ua maea ua litaea e le i oo i ai se faalavelave.

E pei o le popolega lava o lenei sui usufono, e pei o le manulauti na faatu ai lenei Faalapotopotoga ina ia faaitiitia mea o faalavelave, aemaise foi o tulaga i mala faalenatura. A faapea la e te litaea lava oe e le i oo i ai se faalavelave ia oe, ona faafetai lea i le Atua, ae pei o lea ua toe aumai le talosaga, le tuualalo i le Komiti ina ia maua nai faamanuiaga ae pei o le agaga lena e tau augata ai lenei sui usufono e le lagolagoina ai. A ua uma lava le tausaga tapulaa e le i oo i ai se faalavelave, e pei o le agaga lena lea sa fai ai lenei Kamupani po o lenei Faalapotopotoga ona o le popolega lena o le sui usufono, e pei ona saunoa le Taitai o lenei foi Itu ne i te i ua alu alu avatu i ai faamanuiaga ae fai mai loa se mala faalenatura, o fea la e tua i ai la tatou Faalapotopotoga.

Lona lua o le tulaga o lea kava i le tulaga i le faamanuiaga ona o lea sa popole lava le sui usufono e pei e kava na o e o lea e aafia i ni tulaga i taavaleafi, a oo foi la i tai i le sami i le tulaga i vaafaagota ona o le penisini. Ae pei o se tuualalo lava i lau Afioga, a faapefea le tagata lea e alu e fagota se i tulou, i le matatao ae malemo ai? Ona e maitau na o e... ona o le penisini. E na o vaega lava na e

fia tuuina atu i lalo, pe le mafai ona kava ai ma latou na e le o mafai ona maliliu e pei o ni faalavelave i le sami e malelemo e le i o i ni vaafagota ae o lea e o lava latou e tuissea ma o atu malelemo ai ma tulaga faapena.

Lona lua o le isi talosaga a lenei Itumalo ona o lea e pei e penefiti na o latou e maliliu sa agavaa e tipi lana ACC pe sa... Ia o le tatalo pe le mafai ona tuuina atu o le maliu lava ma le faalavelave ina ia penefiti uma o tatou tagata, leaga o lea e pei e faapitoa lava e le mafai ona e entitle pe a tupu se faalavelave pe a faapea e te le i faigaluega ma tipi sau ACC. A o le tatalo ina ia mafai. Ole faalavelave lava ia pe le i faia se ACC ia agavaa ma entitle uma.

O le Lipoti i le tulaga i le Maketi na o sina faafesili lava ona o lea e maua ma silafia le Maketi Fugalei lea e i ai le Lipoti e 9 pisinisi o lo o fai ai e nai tagata mai fafo. E pei o le agaga lena e le faapea e faailogalanu le sui usufono.

Ia maitaulia foi o sefe panikeke ma nai mea na a nai o tatou lava tagata, po o le mea foi ua tatala i e mai fafo le faiga o le kekepuaa ma mea faapena leaga o lea e sau i le Lipoti e 9 faleaiga eseese ua faatinoina e tagata mai fafo. Manuia le fonousu a le atunuu lau Afioga i le Fofoga Fetalai. Ma le faaaloalo lava.

FOFOGA FETALAI: Malo faafetai, malo saunoa i lau Afioga i le sui usufono mamalu. Tulai mai le sui usufono mo Aleipata Itupa i luga.

Afioga FUAAVA SULUIMALO AMATAGA: Lau Afioga i le Fofoga Fetalai, faafetai lava mo le avanoa. E puupuu lava foi si au faafesili e tasi, e auga foi ma nisi o finagalo ua faaalua. Ae o le tulaga lea i le ACC mo e faisaofaga lea e totogi pea le ACC aemaise le afaigaluega i kamupani ma le Malo.

Sa taua foi e nisi foi o lauga a lenei Itumalo i le tulaga foi lea e tai pei o le faiga lea e fai ai le NPF, a maea e aumai atoa lau saofaga ma tulaga ia. Ae pei o se tulaga foi lele, a faapea e uma ma e litaea e le i faia lava sau claim ona o lou naunau e puipuaia oe ma aua ne i e aafia i ni aafiaga, pe leai sina mea foi lea pe 10% mai lau contribution aua ou te iloa lava e i ai faamaumauga a faapea e uma ane le fia sefulu tausaga o e galue, e le iloa pe maua ane pe \$10,000 sau contribution i totonu. Pe na o se 10% entitle foi lea e pei se reward ia oe ua e malupuipuaia ua e le aafia i ni... aua e i ai le isi tagata e uma lava le olaga faigaluega e tetele atu claim e spend i ai i lo lana contribution lea e avatu.

E pei la o si mea la lena o le faigataulaga lena a tatou e fesoasoani i e o lo o aafia soo, a o e lava o lo o taumafai e tausisi e tausisi lelei le saogalemu e tatau ona i ai sina e pei o se reward foi lea a lava se 10% tainane foi mai se \$10 ae pei o se faafetai lena o lou taumafai e malupuipuaia lou soifua ina ia aua ne i e aafia i ni faalavelave. Ma le agaga faaaloalo. Faafetai.

FOFOGA FETALAI: Malo faafetai, malo saunoa. Tulai mai lau Afioga i le Taitaifono, o lea ua maua atu o lea ua e talifuaitau foi i nisi foi o tuualalo ma finagalo foi o le Maota.

Tofa ALE VENA ALE: E momoli atu le faafetai i le paia ma le mamalu o sui usufono o le Palemene na sausaunoa foi i le Lipoti a lenei Komiti, ma e taua

tele fautuaga ua momoli mai e sui usufono i lenei taeao. O le finagalo na faaalua e le Afioga i le sui usufono mo Lepa ina ia mautinoa e malupuipua teugatupe a le tatou Faalapotopotoga, ona o le popolega ina ne i tulai mai ni tulaga ogaoga ae le o lava se tupe e fai ai tau mo ia... ma o tatou o le atunuu kerisiano o lea tatou te tatalo i le ao ma le po ina ia alofagia e le Atua Samoa, ina ia mamao ma ni mala ma ni puapuaga faalenatura. Ae faafetai i le Afioga i le sui usufono mo Lepa mo lana fautuaga.

O nisi o fautuaga e pei ona atagia mai ai le Afioga i le Sui Taitai, e moni lelei lava le fautuaga na saunoa foi i ai aemaise nisi o sui usufono ma o le agaga lava ia o le Tulafono o lo o faatautaia ai le Matagaluega o Tau mo Faalavelave ua uma lava ona taoto faiga faavae a le Matagaluega ma o lo o toe silasila foi i ai i nisi o itu e ono tapue ai tulaga aemaise le itu e pei ona saunoa ai nisi o sui usufono i nisi foi o le aufaigaluega ua maliliu ua muta le taimi lea e 6 masina ae... Ia o lea e taumafai e toe maua se avanoa aua o ia tagata o la e totogi lava a latou faamanuiaga a o lea e le i oo i se faalavelave a o lea ua faamuta i le taimi lea e pei ona silasila i ai. E pei o fautuaga uma na a le Matagaluega.

Ia faatasi ai foi ma atugaluga o nisi o sui usufono, o lea o le a silasila i ai le Pulega foi ma le Matagaluega aua nisi itu e faaleleia ai le auaunaga aemaise lava le atunuu lautele i o tatou tagata, aemaise o le tautuaina o le atunuu ma le tatou Malo. Ia seivagana e i ai se isi mea e le i oo i ai le tautalaga a lenei foi Komiti, ae ou te lagona ua tali atu i tulaga foi e pei ona tuuina mai ai fautuaga. Ma le faaloalo tele lau Afioga i le Fofoga Fetalai.

FOFOGA FETALAI: Malo saunoa lau Afioga i le Taitaifono, ia se i tulai mai lau Afioga i le Tamaitai Palemia o le Sui Minisita foi o le tatou Faalapotopotoga.

Afioga FIAME NAOMI MATAAFA: Faafetai i lau Afioga i le Fofoga Fetalai mo le avanoa. Ia o le Lipoti a le Komiti o lo o i le Laulau a Fono ma o lea ua felafolafoai le Maota, e 3 fautuaga o lo o aumai ai ma ua faapea foi ona talifuaiteu le Malo.

O le vaega muamua o lo o talanoaina i se tulaga lautele faamanuiaga mo le aufaigaluega aemaise i le taimi ua malolo mai ai galuega. Ua faamauiina finagalo ua faaalua e tusa i lea itu. Ma o lea foi o lo o maua atu i faamanuiaga o e aafia i faalavelave o lea o lo o aumai ai foi se mau e faalautele atu, le na o tagata faigaluega ae o tagata lautele. Ou te manatu o se mataupu foi lea sa talanoaina muamua foi ma faapena ona faasoai ai faigamalo mai lea taimi i lea taimi. Ae ou te manatu lava sa fai fuafua foi e ave le faamuamua i le vasega o tagata faigaluega.

Ma o lea ua i ai le faaaliga a le Matagaluega i faiga faavae o lea o lo o faagasolo nei le toe iloiloaina o le Tulafono a le Faalapotopotoga e aafia ai foi ma mataupu ia ua felafolafoai i ai le Maota lenei taeao.

Lau Afioga i le Fofoga Fetalai, i le saunoa mai o le Taitai o le Itu Agai i le teumau leleiina o le tamaoiga o le teugatupe lea, aemaise i le vaai i ni faalavelave maoae e ono tulai mai. Ou te manatu o lea foi mataupu e aliai mai

aemaise lava i le faaaogaina o le teugatupe e fai ai ni tupe faafaigaluega pe investment.

O le agaga lava o le tuuina o tupe faafaigaluega e faafaigaluega e le Faalapotopotoga, o le faamoemoe e toe faatupulaia ai le faaputugatupe. A o ia mea uma e ao lava ona mataitu lelei e le Faigamalo aemaise foi le Fono Faatonu ma le Faalapotopotoga i le itu lava lea ina ia lava le tupe e tua i ai i ni faalavelave e ona tutupu mai.

Lau Afioga i le Fofoga Fetalai o le fautuaga lona lua o aseta ma le tausiga o lea foi ua faapena ona tali atu le Faalapotopotoga o lo o faapena lava ona mataituina le tausiga lelei, a ua le faatino e le Matagaluega po o le Faalapotopotoga, o lo o tuuina atu i Faalapotopotoga po o pisinisi o lo o i ai tomai e faapena ona tausiga lelei aseta o lo o i ai.

O le fautuaga lona tolu, o le faatupeina lea o nisi o meafaigaluega po o le tatou Matagaluega o le Soifua Maloloina po o le fesoasoani foi i le Fuimu ma le galuega a Leoleo i luga o le pulea lelei o feoaiga i luga o aualatetele. E le tau faamatalaina lau Afioga i le Fofoga Fetalai, ua leva lava ona fai ma masani a le Faalapotopotoga leni le lagolagoina o tatou itutino ia o le Malo, aemaise le faatau mai o nisi o meafaigaluega o lo o moomia.

Ou te manatu o isi fautuaga ia ua aumai aemaise lava mo faamanuiaga o le aufaigaluega ma e ua litaea, ia o lea ua faamauina e tuuina atu i le Faalapotopotoga. Faafetai mo le avanoa.

FOFOGA FETALAI: Malo saunoa lau Afioga i le Tamaitai Palemia, o le Sui Minisita foi o lo o vaaia le tatou Faalapotopotoga. Malo lava mo le tali manino aemaise foi o fuafuaga alualumamao a le Faalapotopotoga aua lava... e pei foi o manaoga ma saunoaga a sui usufono mamalu o le Maota. Malo faafetai.

Tulai mai lau Afioga i le Taitaifono mo le lafo.

Tofa ALE VENA ALE: Lau Afioga i le Fofoga Fetalai ou te faatu le lafo, *Ina ia faamaonia e le Fono Aoao le Lipoti a le Komiti e pei ona iloiloina o le: P.P.2022/2023 Nu.105.*

Faaluaina e le sui usufono mo Faasaleleaga 2, sui usufono mo Aana Alofi 3 ma le Minisita mo Leoleo, Falepuipui ma Auaunaga Tau Tineimu.

Na faamaonia le lafo.

FOFOGA FETALAI: Ou te tapa lau Afioga i le Tamaitai Palemia mo le lafo.

Afioga Hon FIAME NAOMI MATAAFA: Lau Afioga i le Fofoga Fetalai ou te faatu le lafo, *Ina ia faamaonia e le Fono Aoao Tali a le Malo i Fautuaga a le Komiti o le Vaega Tau le Va Fealoai.*

Faaluaina e le Sui Palemia, Minisita mo Faatoaga ma Faiga Faiva ma le Minisita mo Taaloga ma Alagaoa mo le Fiafia o Tagata.

Na faamaonia le lafo.

P.P.2022/2023 NU.65, LIPOTI A LE KOMITI O LE VAEGA TAU LE VA FEALOA I LE P.P.2020/2021 NU.72 MA LE P.P.2021/2022 NU.59, LIPOTI FAALETAUSAGA A LE PULEGA O TINEI MU MA FAALAVELAVE TUTUPU FAAFUASEI A SAMOA MO TAUSAGA FAALETUPE 2019/2020 MA LE 2020/2021 - ILOILOGA

P.P.2023/2024 NU.63, TALIA LE MALO I LE P.P.2022/2023 NU.65

FOFOGA FETALAI: Tulai mai lau Afioga i le Taitaifono o le Komiti o le Vaega Tau le Va Fealoai.

Tofa ALE VENA ALE: Lau Afioga i le Fofoga Fetalai ma le faaaloalo tele ou te tulai atu ai e faatu le lafo, *Ina ia faautagia e le Fono Aoao le Lipoti a le Komiti o le Vaega Tau Le Va Fealoai o lo o tuuina atu ai ana Sailiiliga, Fautuaga ma Iugafono.*

Ma le faaaloalo tele.

Faaluaina e le sui usufono mamalu mo Aana Alofi 3 ma le Minisita mo Leoleo, Faalupui ma Auaunaga Tau Tinei Mu.

Na faaluaina le lafo.

FOFOGA FETALAI: Ou te tapa lau Afioga i le Minisita o le Pulega o Auaunaga Tau Tinei Mu ma Faalavelave Tutupu Faafuasei.

Afioga Hon FAUALO HARRY JEFFERY SCHUSTER: Lau Afioga i le Fofoga Fetalai ou te faatu le lafo, *Ina ia faautagia e le Fono Aoao Tali a le Malo e faatatau i Fautuaga a le Komiti o le Vaega Tau le Va Fealoai.*

Faaluaina e le Minisita mo Faatoaga ma Faiga Faiva, Minisita mo Fesootaiga ma Faamatalaga Tekonolosi ma le Minisita mo Punaoa Faalenatura ma le Siosiomag.

Na faamaonia le lafo.

FOFOGA FETALAI: Ua maea faautagia e le Fono Aoao le Lipoti a le Komiti faapea foi Tali a le Malo i Fautuaga a le Komiti. O le avanoa leni se tasi o sui usufono mamalu e fia saunoa i le tatou Lipoti. Tulai mai lau Afioga i le... Ia malie se i tulai muamua mai le sui usufono mo Safata 1.

Afioga LEAANA RONNIE POSINI (Safata 1): Lau Afioga i le Fofoga Fetalai, faafetai tele mo le avanoa foi o leni Itumalo, ae momoli foi le agaga

faafetai tele i le Afioga i le Minisita aemaise foi le Taitaifono. Ae faapitoa foi le faafetai i le Matagaluega o le Tineu Mu mo le latou galuega faifaipea lea ua tatou talitonu foi i nai taimi ua tuanai e tele lava malaia na oo i ai le tatou atunuu ua aafia ai tulaga o kamupani ma pisinisi, ae faafetai lava i lo outou galulue.

O lea ua vaavaai atu i le latou Lipoti lea, ou te talia foi le fautuaga lea e aumai i le Lipoti a le Komiti faapea foi Tali a le Malo. Ae faamamafa e lenei Itumalo ou te masalo o le 2016 na ou tulai ai foi totonu o le Maota lenei ma ou talosagaina ai se Fale Tinei Mu i le itu lea i Saute i Upolu aua o lea foi ou te vaai atu o lea foi e aumai le fautuaga a le Malo ua tataua ona faatu nisi Fale Tinei Mu i le tatou motu. Ae mamafa lou mafaufau i le itu lea i Saute o Upolu lea e i ai Falealili, Siumu, Safata ma Lefaga. A silasila foi le tatou Malo, o le tele o faletalimalo lea ua i ai o lea e pau i le itu lea i Saute. Na i ai foi nisi faletalimalo lea na aafia i le mu. Ia na faatalitali taavale tinei mu na o atu i le malaevaalele ma o atu i Faleata, e o atu ua tele lava ina faatamaia le tele o mea. A o lau lea maitau, o le ala foi lea na lagalaga ai so matou manatu i lenei taimi i le 2016, e tataua ona agai i ai se fuafuaga a le tatou Malo.

O lea foi na ou maitau, o lea foi ua tulai mai le Aifoga i le Minisita o Safata 2 lea foi sa saunoa ai i totonu o le Maota lenei. Aua a ou vaavaai atu i le tulaga lea, e pei ogatotonu i ai Safata i le itu lea. I lau lea maitau afai e toe tutupu mai nisi faalavelave i tulaga faapea i le tele o faletalimalo, ou te talanoa atu i le aufai faletalimalo ua manaomia a, manaomia se tulaga faapea.

E le gata foi i lea a outou silasila foi i maota o falesa ma maota o faafeagaiga e le taugofie foi tupe la e fau ai. Ua ova tai \$1 miliona ia tupe la e fausia ai falesa a Ekalesia taitasi. O le ala lea i lau faitau atu o lau tatalo i le tatou faigamalo, o le a se fua, ona ao foi lea ona ave le tatou faamuamua i le tulaga lea i le Fale Tinei Mu.

O lea foi ou te vaai atu i le tulaga lea, a i ai foi ni afioaga i ni eleele po o ni fanua o avanoa e ono fai ai ni... ia ona lipoti mai lea i le tatou Malo. Ia, o lea e avanoa le fanua o lenei Aiga e fai ai le Tinei Mu. Ma le agaga faaloalo faafetai.

FOFOGA FETALAI: Malo faafetai mo le sui usufono mamalu. Se i tulai mai le Sui Taitai o le Itu Agai.

Tofa Hon LAUOFO FONOTOE NUA FESILI PIERRE LAUOFO: Faafetai i lau Afioga i le Fofoga Fetalai. E faamauina foi le faafetai i lau Afioga i le Taitaifono ma le Komiti faapea foi Tali a le Malo e pei ona faatulai mai e le Afioga i le Minisita.

O le tasi lenei Matagaluega taua a le tatou Malo e momoli atu ai le faafetai ma le faamalo i le Afioga i le Komesina le Afioga ia Tanuvasa, faapea foi le Pulega ma le aufaigaluega aua o le galuega lenei, e tasi lenei essential services e galulue 24 itula, 7 aso o le vaiaso e le malolo. O lona uiga o le taua tele o le latou foi pitolaau e lagolagosua i le atunuu, faapea foi le tatou Malo i fuafuaga ma tali atu i faalavelave tutupu mai i malaia, le mu.

E pei foi ona manatua ma silafia e le i mamao atu nei ni mu tetele se lua i totonu o le taulaga i Apia sa faatamaia ai se tasi o faletalavai, ae faapea foi se tasi o fale i tua o le faleaiga foi lea o le Sunrise. O lona uiga e taua tele le tulaga

lea. E taua la e pei ona ou faitau i le Lipoti i le faamalosiā o fire alarms systems i totonu o falefaigaluega, i totonu o faleaoga ae faapea halls ma mea o tulaga faapena e oo i tatou malaevaalele ma falemai ma isi uma nofoaga o lo o autovaa ma faaaoga e le mamalu o le atunuu aua lo latou saogalemu ma vave iloa pe faapea e tulai mai se mu. O le tulaga lea e taua ai tele i lau vaai le fuafuaga e pei ona i ai. I le fautuaga foi a le Komiti, ua faamalo. O lea foi e maitau atu i le Lipoti o lo o talosagaina e le tatou Matagaluega po o le Ofisa Tinei Mu se fesoasoani mai tatou paaga masani aemaise lava le atunuu o Iapani mo ni tatou taavale tinei mu fou. O se tulaga lelei faamalo faafetai. Ua tatau foi ona sui pe replace isi tatou taavale tinei mu ia e i ai nei, aemaise la o lea e manaomia i lau vaai se tatou taavale tinei mu foi lea e fai se apefai umi ona o lea ua tele nai a tatou fale mauaululuga e pei ona i ai totonu o le taulaga. E manaomia la se tatou taavale tinei mu e pei ona tatou vaavaai i ai foi i isi atunuu, e i ai le apefai umi foi lea ina ia au i luga o isi fale fogafale mauaululuga, tatou fale o lo o i ai i totonu o le taulaga o Apia. O tulaga ia e pei ona ou maitauina. O lona uiga e taua le faafou o tatou taavale ma taavale talafeagai pe a faapea e tulai mai se mu.

O lea ou te maitau atu i le Tali a le Malo lau Afioga i le Minisita, o lea foi e pei o lo o silasila le Matagaluega i le tuuina i totonu o mea o tatou taavale ia e faaaoga, le public transport po o taavale ia e faaaoga e feaveai ai le mamalu o le atunuu. Masalo ai po o pasi, e le o taua mai i i pasi, a o lea e taua mai taavale la ia e taua foi i lou talitonuga ma lou vaai i ai, e taua foi lena mataupu o lo o silasila i ai le tatou Malo. Atonu o se mea e tatau ona fai ona o le naunautaiga lava ia malupuipua le mamalu o le atunuu o lo o faaaogaina a tatou public transport.

Lau Afioga i le Fofoga Fetalai, e manatua ua lava lea manatu. Faafetai mo le avanoa.

FOFOGA FETALAI: Faafetai malo saunoa malie le... Ia tulai mai lau Afioga i le Taitai o le Itu Agai.

Susuga Hon TUILAEPA FATIALOFA AUJELUA SAILELE MALIELEGAOI: O lea o le a fai lau lauga. Lau Afioga i le Fofoga Fetalai ou te tulai atu foi e momoli le faamalo i le Komiti, aemaise foi le Pulega o le Fuimu faapea le Minisita o lo o vaai lena foi Faalapotopotoga. E faaopoopo atu i fautuaga a lena foi itu, o taavale ia tatou te faaaogaina o le tele lava o taavale nei e aumai faamealofa mai Siamani, o Ausetalia e sau ai isi, ia lea ua tau mai foi Iapani.

E taua tele le tatou talanoa i Malo e maua atili mai ai tatou taavale Fuimu. O le mu lea na mu ai tatou tane suauu, ana le aumaia le... E lua lava mea tetele na tulai mai ai... tane suauu ia na mu i tai i le uafu a o la e tu ai tafatafa le isi foi tane suauu o la e tumu. Semeamanu lava pe le... ae na mafua ona pe ona ua taunuu mai le taavale fuimu tele lea a tatou mai o le malaevaalele sa faatali se i uma ona land le vaalele ona sau ai lea. E leai se taavale fuimu na i ai i Apia e gafatia le mu lea. O le mea lea e taua ai le fautuaga lea a le Sui Taitai o lena itu, e tatau lava ona aumai se fale fuimu faapitoa lava mo Apia aemaise

faletetele ia. Na pe la le mu lea ona ua faatoa avanoa mai le taavale fuimu mulimuli, ae le mafai ona pe na o le tafana i ai o suasami. Ae semeamanu le tatou tapatapa ia Amerika Samoa na aumai ai le uta o pauta, pauta ia e tuu i totonu e mix ma le vai ona tape ai lea o le afi. O lona uiga, na o le pau lava le mea a tatou lea na fai i tai i le taimi lea foi lele pe ana faapea e le aumaia mea ia na o le asu lava i ai o le sami ma taumafai e faamalu le tane lea ia aua ne i mu le tane lea e sosoo ai.

O le mea la lea e matua taua tele lava le i ai lava o se taavale fuimu iinei i Apia nai lo le tau faatalitali aua afai e aveese mai le taavale fuimu la e i o ae faapefea le malaevaalele. Tasi lena mea e aafia ai ma tatou i luga o Tulafono faava o Malo i le malupuipua o tatou tagata femalagaai. O le tulaga taua lea e matua faatau tele ai le i ai lava o se taavale fuimu tele lava e pei o le taavale fuimu la e i o i Faleolo.

Lona lua, ia lava a tatou oloa ia o pauta e alu faatasi ma le vai, e tapegofie ai le mu. O le fautuaga lea e aumai i i, e tatau ona i ai ni tamai mea foi ia fuimu e tuu i totonu o Ofisa. A tupu mai loa se afi vave ona tape i ina, ae tatau foi la ona o outou lea e vaaia fale fuimu e o e faataitai ina ne i te i ua tutu ai i ina ae oo ane i le taimi e mu ai ae aumai e leai se kesi o i ai toe leai se isi na te iloa faataitai. O le mea la lea e taua ai le fautuaga lea ae tatau foi ona fai ma o Ofisa o le Fuimu e faataitai i Matagaluega uma lava o i ai mea ia, aemaise faletetele ia, ia mafai ai lava po o le Ofisa o le Minisita po o le Ofisa o le Pule Sili e tupu ai se afi faaoga loa mea ia ma tape vave ai le mu.

O le mafuaaga o le mea lea, o le ta o le 4 i le vaveao na ou usu mai ai i le isi taimi o talosaga foi ia faale-Malo, ou te sau ae mu loa i i le fale lea o si alii foi lea Tonga lea sa fai lona falesuisui ma mea ia o isi oloa, ou te oo mai i ina i le vaveao, faatoa mu mai le afi i totonu. Ona ou faatopetope ai lea i o i le Fuimu, ou te alu atu e toatasi lava le tagata i ina, ua fai si leva po o le 15 tausaga talu ai, ou te alu atu o la e fuifui taavale mai ai le tagata e toatasi, ona ou alu atu loa lea tau i ai le mu lea e tatau ona omai e fui. Toetiiti atoa le 45 minute faatoa ou faalogo mai ua uu mai le taavale, ia e sau ua le aoga ua mu atoa le fale.

O le tulaga lena e taua tele ai fautuaga ia e avatu, aemaise lava le au avetaavale a le Faalapotopotoga lea e feoi ambulance, e aumaia gasegase ma tagata ua lavevea i le falemai i le uu o latou pu foi ia e lapatai mai ai tagata ma le soona alu faale-mafaufau o taavale. O o i atunuu la e i ai, e matua ee lava le pu e warn mai ai tagata ae sau sau malie lava le taavale e vaaia lelei le safety. O le mea lena o lea na lavevea ai nisi taavale, ona o le soona masasau vale o taavale nei.

O le tuualalo i le Pule, ae taua foi ona siaki i latou o lo o faaogaina, leaga e uma ona faatonu ae o lava latou fai mea e mananao ai. O le isi foi la itu taua, o le fai o faasalalauga i le tatou atunuu, fai le faasalalauga. A outou faalogologo mai ua ee atu le taavale, le ambulance, soso i tua, aemaise lava mea o loli tetele. Ua i ai taavale ua lavevea ona o le mea lea e le o lagona mai le pu, o la e faalogologo i ana telefoni. O le tele ia o tagata ia e feoi ma faaoga telefoni ma lavevea ai taavale. Atonu o se mataupu lena e avatu i le Minisita o lo o vaaia mea ia, aemaise lava le Minisita lea e le o nofo mai lea ua sifi mai i ai le vaaiga o taavaleafi, e tatau ona fai a latou faataitaiga ina ia silafia ai e tagata mea ia, o le tele ia o tagata o lea e feoi i le aualatele e talatalanoa i telefoni ma tagata e

le o iloa lava le mea e pio ai ona alu atu lava lea tutu ai lava ae alu sao ae taofi uma ai tagata ia e fia pio ona o le mumu pea o le moli.

Ia, o le fautuaga lena ma le faanaunautaiga, e faatino loa, aua ne i mulimuli i le Minisita lea fai mai o lea o le a ta pau le samala, lea o le a pau le samala. E leai lava ma se samala o pau. Ia lau Afioga i le Fofoga Fetalai, ia o le fautuaga lena ma le tuualalo.

FOFOGA FETALAI: Malo faafetai. Se i tulai mai lau Afioga i le Minisita mo le Soifua Maloloina.

Afioga Hon Valasi Luapitofanua Toogamaga Tafito Selesele (Minisita mo le Soifua Maloloina): Lau Afioga i le Fofoga Fetalai, masalo o au la e faatatau i ai le saunoaga a le... ae ua leva ona uma le tatou fonofono pe ana le talatala le lalolagi, ae tau saunoa sao i Lipoti. Ia o le fautuaga lea i lau Afioga i le Taitai o le Itu Agai, soia ia e te taea i ma o...

Susuga Hon Tuilaepa Fatialofa Auelua Sailele Malielegaoi: Lau Afioga i le Fofoga Fetalai, ia o le mea lena e leaga ai le mea o le Minisita e moe, e moe moe te i ane e sese le mea... e te le o malamalama i le talanoaga lea e fai nei.

FOFOGA FETALAI: Ia...

Afioga Hon Valasi Luapitofanua Toogamaga Tafito Selesele: Lau Afioga, se i fai lava lau tala lea lau Afioga i le Fofoga Fetalai. Ou te le o moe, ou te matau lelei upu ma lafoga a le Taitai o le Itu Agai ma le la itu. I le taimi na valaaulia ai le... a o Palemia le Afioga ia Tuilaepa...

Susuga Hon Tuilaepa Fatialofa Auelua Sailele Malielegaoi: Lau Afioga i le Fofoga Fetalai, pau lava le mea lea ou te tulai atu ai, e faasaosao le tatou taimi, e faasaosao le tatou taimi, leaga e tele upu valea e fai e le Minisita lea.

Afioga Hon Valasi Luapitofanua Toogamaga Tafito Selesele: O le taimi sa ou valaaulia ai e tatala lau Pati, ia o lau tala lea e fai atu i lau Afioga, sa vaai maualalo lava le Afioga ia Tuilaepa. Fai mai lana tala ia te au, "Ia, ailoga ou te avanoa." Ou fai atu, "Tuilaepa, e ala ona ou sau i lau Afioga o oe o le Taitai o le atunuu, e te faamanuia." Pau lava lea o lau faamanuia a.

Susuga Hon Tuilaepa Fatialofa Auelua Sailele Malielegaoi: Ou te le iloa foi lau Afioga se ma feiloaiga na fai, ae pepelo foi lea faamatalaga.

Afioga Hon Valasi Luapitofanua Toogamaga Tafito Selesele: Ae sa manatu faatauva. Ona ou fai lea i ai...

Susuga Hon Tuilaepa Fatialofa Auelua Sailele Malielegaoi: O lau fautuaga, o lea e manaia lava le sologa lelei o tatou fonotaga a o lea foi ua fai lea talapelo.

Afioga Hon Valasi Luapitofanua Toogamaga Tafito Selesele: Malie e sili lou alaala mai lalo o lea e talanoa le Minisita.

FOFOGA FETALAI: Ia malilie mai, ua manatu foi le Nofoa o lea ua taua le tatou faagasologa o le tatou galuega.

Afioga Hon Valasi Luapitofanua Toogamaga Tafito Selesele: O lau tala lau Afioga i le Fofoga Fetalai, leai ou te faamalulu atu, ua leva lava ona matau nai ana saunoaga pei o ia o se faiaoga o le Maota, a saunoa ua fai mai o le a ma le a, a o mea sa na faia, a.

Susuga Hon Tuilaepa Fatialofa Auelua Sailele Malielegaoi: Lau Afioga i le Fofoga Fetalai, o le sui usufono leni, e tatau lava ona fai ma ou tutulai atu, leaga ua tele ana mea faavalevalea lea ua fai i totonu o le Maota.

Afioga Hon Valasi Luapitofanua Toogamaga Tafito Selesele: O lea la ou te talanoa atu, ou te le i moe, e faasao le Afioga ia Tuilaepa sa ou manatunatu lelei a. O lea la ou te talanoa atu e le aoga la ona tee, o lea ou te tu atu e faasao le mea sese lea e fai mai. Sa manatu maualalo lava i lenei taimi, o le a le taimi lea ua i ai? Ou fai atu, “Tuilaepa o le a ou alu e sue ni au sui tauva po o le a lava le ituaiga faiga, e tauva ma lou malosi. Ia lea la?”

Susuga Hon Tuilaepa Fatialofa Auelua Sailele Malielegaoi: Lau Afioga i le Fofoga Fetalai, ma te le i talanoa ma le sui usufono leni.

Afioga Hon Valasi Luapitofanua Toogamaga Tafito Selesele: O lea e molimau le tele o tagata...

Susuga Hon Tuilaepa Fatialofa Auelua Sailele Malielegaoi: Lea ou te tulai atu ai e ma te le i talanoa.

Tofa Ale Vena Ale: Lau Afioga i le Fofoga Fetalai, a tusa ai ma lou finagalo, ua ou manatu e tuuina atu Tali a le Komiti e tusa ai ma felafolafoaiga i le mataupu lea faafetai.

FOFOGA FETALAI: Ia ua ou talitonu foi o le taimi leni lava leni o lau Afioga i le Taitaifono.

Afioga Fuaava Suluimalo Amataga: Lau Afioga i le Fofoga Fetalai pe maua se avanoa faamolemole.

FOFOGA FETALAI: Oi ua aoga le sui usufono mo Aleipata Itupa i Luga ua...

Afioga FUAAVA SULUIMALO AMATAGA: E vasai ai foi lea mea e sefesefe le tatou taimi. Ia o le itumalo lenei e agai sao lava i le mataupu ma e taumafai foi e faapuupuu e manumanu i le tatou taimi. E tolu lava mu tetele sa tulai mai a o ou galue i totonu o le Matagaluega o Punaoa Faalenatura ma le Siosiomaga, ma o le Matagaluega foi lea e Taitaifono i le DAC po o le Komiti lea mo Faalavelave Faafuasei. O le mu lea i le uafu i tai i le tane suauu, o le mu lea i le flea maketi i Savalalo ma le mu lea i Tafaigata i le lapisi. O le tele ia o le aoaoga sa tulai mai lea taimi i le galulue ai la o Matagaluega uma ma Faalapotopotoga lea e i totonu o le DAC po o le Komiti lea o Faalavelave Faafuasei lea e ala ai ona tau afua se faamatalaga i tulaga, o aoaoga na maua mai na mu tetele. O lea na mafai ona faatamaia le mu lea o le tane suauu i le uafu, pei ona saunoa ai foi le Taitai o lea itu, ma e sao ana le oo mai le loli tele lea i Faleolo ma le latou oa, le pauta lea, o lea na faatamaia ai le mu lea. O Savalalo e le i successful i le tatou maketi, e i ai tulaga na tulai mai. O uta i le tatou lapisi i Tafaigata, e tele foi lona aafiaga ona o le lapisi e mapuna mai ai le kasa lea e faaolaina le afi, ma o le tulaga la lona o le faigata lona ona tape. A o lea vaitaimi atoa, o taimi tonu lava ia a outou silasila i le tala o le tau, o taimi ia o le mugala i le mamago o le siosiomaga, ua faigofie foi ona ola le mu. Ma o aoaoga taua ou te faaso atu pea, aua le Matagaluega, o le Faalapotopotoga aemaise foi o le Minisita. Faafetai i le Lipoti a le Komiti, faafetai foi i le Minisita aemaise o le Fuimu.

O lea ua ou matamata i le taulaga, faafetai o lea ua alu le galuega o le faaleleiga o auala aua tapenaga o le tatou fonotele a Malo o le Taupulega. Ae ua ou matau ai foi i isi mea ia sa ponatia ai le galuega lea o le faiga o le fuimu lea i le maketi. O lea a outou silasila i le magatolu lea i Savalalo, o lea ua toe fai uma manholes o mea ia e i ai valves ma mea ia e fekiaai solo ai tatou paipa ia malosi fuimu. O le mea lona na tupu i lona taimi, ua omai nei le fuimu ua ki atu hydrants e le o lava se... ia taufetuli mai foi i i ua faata atoa luga o isi mea ia e i ai tatou hydrants ia. Ia ma o lea ua ou matamata foi i le tatou faataga auala lea, ua manaia, ae o la e ou te talitonu ou te maitauina lelei mea o la e sa i ai ulu ki nei, o la e ua toe faata, lona uiga a tupu mai foi se mea e omai e tau fetuunai le pressure o le vai, faamalosi i i, faavaivai i i, o la e foi la ua... O la e i ai vaega ou te vaai o la e omo vaipanoa na e toe faaleleia, ae ou te talitonu o lo o i ai foi nisi o vaega o la e ua alu atu lava le ta ma lilofia ai. A o se tulaga lea, o lau iloa e galulue faatasi ai le Komiti lea o Faalavelave Faafuase ma Matagaluega e fia, le LTA, SWA, aemaise foi le Matagaluega o Atinae Tetele ina ia faavagavaga mea nei, aua leaga a tutupu mai loa mea nei, e leai lava se isi mafai e taumafai e tulei mai le vai ia malosi aua le galuega a le Fuimu.

E pei o se tulaga lea e taumafai atu ai i tulaga ia e silasila i ai latou o lo o taumafaia tulaga ia, aua leaga o mea ia, o aoaoga ia sa maua mai isi mu ia. E tupu le tulaga lea i le mu i le maketi i Savalalo, a o i ina tonu lava i le magatolu lona tout e vaai i ai, o le tele ia o taulaiga o tatou laina tetele o lo o i ai i ina. E mafai la ona fetuunai e valves ia le malosi i le isi itu, faavaivai le isi itu, faavaivai le isi itu, ina ia lava le supply o le vai mo le galuega a le tatou Fuimu.

Ia o tulaga uma ia ou te iloa, a oo foi i le taimi o mugala, o lo o i ai foi le galuega a le Fuimu e faapena ona fautuaina le tatou atunuu, faaitiitia ituaiga

galuega. O lea foi la e oo lava ia i latou ua fai le uelo, le uela po o le... ia ua fai foi le laisene ma e fai foi le pemitā, leaga e tasi lea mea, e emo loa le afi faigofie ona sosolo pe a faapea ua matutu le vaega o le siosiomaga. Ou te iloa foi o la e ua i ai i totonu o le Tulafono a le Fuimu le faiga o tatou fagu foi lea e i ai le kesi ma le oa, e faapena ona tape ai mu i totonu o Ofisa. Ae ou te iloa foi ua faamalosia i totonu o le tatou building code le tulaga lea ia i ai ni mea ia e tape ai mu i totonu o fale fou ma tulaga uma faapena. Ou te iloa faletetele o la e ua i ai tulaga foi ia o sprinklers ia e i totonu e mu loa oso loa le vai lea e faapasi i totonu o... ae o lau iloa e avatu pea faafautuaga ia faamalosia pea le tulaga lea o tatou fire drills i Matagaluega aua o la e ua i ai tatou fagu ia a o si ona lave e le o malamalama tele le aufaigaluega, na ona mu lava alu loa le taufetuliga ae o lea lava e i ai i totonu i i le fesoasoani muamua e taumafai ai e tape le mu ae le i sosolo. Ou te iloa foi le tele o Matagaluega ma Faalapotopotoga o le vaega lea a le Komiti mo Faalavelave Faafuasei ua uma foi ona tapena ai so o se Ofisa, e tataua ona i ai le latou safety plan ma e i ai uma lava aiaiga ia ina ia iloa ona faatino tulaga ia ina ia faaitiitia ai le tulaga lea, ae le i oo mai le Ofisa o le Fuimu ua i ai le fesoasoani muamua lea e faaoga ai tatou fagu ia e tape ai mu ma mea faapena. Ou te iloa e malamalama uma Ofisa o lo o i ai tulaga ia, ia o le fesoasoani muamua lena e tau tuutiitia ai foi le tele o mu o lo o faapea ona tulai mai a ua tuai atu le tatou vaega o le Fuimu.

Ia na o se fautuaga e taatia atu i ina i le tatou Komiti aemaise o le Matagaluega ma le Afioa i le Minisita ma le agaga faaaloalo.

Afioa Sulamanaia Fetaiai Tauiiili Tuivasa: Lau Afioa i le Fofoga Fetalai, e fia maua se avanoa ae le i tali le Taitaifono.

FOFOGA FETALAI: Ia, tulai mai le sui usufono mo Vaimauga 1.

Afioa SULAMANAIA FETAIAI TAUIIILI TUIVASA: Ma le agaga faafetai e vave lava le manatu o le Vaimauga ona o le Vaimauga foi o le Taitaifono po o le Minisita o le Vaega lea. O le fautuaga lona tolu, ia o lea e aumai i ni fanua. Ou te tatalo atu i lau Afioa i le Minisita ua i ai le tatou fanua i Vailele po o Maugafafia ua pasia mai e le MNRE e fai ai le tatou fale fuimu ma le Ofisa o Leoleo. E le o po se lilo i lenei Maota i le masina ua tuanai na matuai faaleagaina ai lava le aiga o si o matou afioaga i Maugafafia po o Vaileleuta, e tolu taavale faaleagaina ma le fale. Ae pei o le tatalo i lau Afioa pe le onomea loa ona avatu se fuimu aua o la e foi e lele lava le tatou vaalele la e i Fagalii ae leai se Fuimu. Pei e manatu faatauva i le vaalele. Manaia ia o Faleolo pe a land nei le vaalele, e land mai a o la e tutu mai lava le Fuimu. A o i i Fagalii ia matou, ia e land mai lava faafetai pe land mai lava ae leai lava ma se fuimu o onono atu. Ia pei e faapena se lagona, o la e ua pasia le tatou fanua la e ua avatu e le Minisita o le MNRE i Vailele e faatino ai se tulaga.

Lona lua o le fautuaga lau Afioa e i ai ma pamupenisini se i tulou. O le tele o pamupenisini ua latalata i mea o faleaoga tulou le Maota lenei. O le popolega lena o lenei sui usufono ina ia mafai ona... aemaise o le vaega lea o lau Matagaluega e faapena ona nafa ma le teena e le gata i pamupenisini a o maota

ma laoa ina ia aua ne i latalata ma faatino i mea e faatino ai pamupenisini ona o le soifua maloloina e le gata o le ea, aemaise o le a le taimi e tupu ai, e faapena.

Lau Afioga pau lena o le vaega, ae momoli le agaga faafetai lau Afioga i le Minisita i le toe tofia foi o le ua faauluulu i ai le Fuimu. E momoli ai le agaga faafetai i lau Afioga ona o le faatuatuaina foi o lea tamalii.

Ia ma le vaega mulimuli o mea o insure a nai alo ma fanau o lo o galulue ai lea vaega o le Fuimu ina ne i te i ua tupu se faalavelave e o atu e fui lemu ae te i ua mu ai se isi. Ae se i fai ni insure e kava ai nai alo ma fanau o lo o galulue i le Matagaluega. Manuia le Fono lau Afioga i le Fofoga Fetalai.

FOFOGA FETALAI: Faafetai. Tulai mai lau Afioga i le Taitaifono.

Tofa ALE VENA ALE: Ou te tulai atu ma le faaaloalo tele e momoli atu le agaga faafetai i Afioga i sui usufono mamalu uma na sausaunoa e tusa ai ma le Lipoti foi ma Fautuaga a le Komiti.

Ma o le talosaga a le Afioga i le sui usufono mo Safata 1, ia o le tausga lea na tea nei na talosaga ai le taavale fuimu lea, o lea ua oo mai le Paeaiga lenei, o lea e silasila i ai le Komesina ma le... ou te iloa o le tulaga lea e silasila i ai le Matagaluega o mea tau tupe i le faatinoga, the cost. E pei o le tulaga lena, ae faafetai mo le fautuaga.

O le tele foi o nisi o fautuaga e pei ona momoli mai e tusa ai o le saunoaga foi a le Afioga foi i le Taitai o le Itu Agai, ia o tatou taavale nei fuimu, they are older models foi nei, lea e fautuaina ai le talosagaina i Malo tetele ia mo se fesoasoani i nisi o taavale fuimu.

I le asiasiga a le matou Komiti i le mea foi o lo o i ai tatou taavale fuimu faapena foi le malaevaalele, aua o taavale nei, they are older models foi nei o special trucks fully equipped i mea tau fuimu. E oo le tau o le taavale i le \$1 miliona. E le o se mea faigofie foi i le Matagaluega, a o lea lava e taumafai le tatou Matagaluega ina ia sailiili mai ni fesoasoani aua le faaleleia atili. O mea uma ia lea e sausaunoa ma manaomia e le tatou atunuu aemaise le tatou Palemene. I fanua foi o lo o faaavanoa, o lea lava e maua e le Matagaluega, o lea foi e afio atu le Komesina ma le Matagaluega o Fuimu, o le a silasila totoa i ai mo le agai i le lumanai, o le a lava le itu e lelei mo le faatinoga o le auaunaga i le atunuu, aemaise le itumalo ma ona tagata, o le itu aupito sili lena ona taua. Ma le faaaloalo tele lau Afioga i le Fofoga Fetalai.

FOFOGA FETALAI: Malo faafetai i lau Afioga i le Taitaifono.

Lau Afioga i le Minisita, pe i ai se mea e te fia saunoa ai e tusa foi ma lafoga sa lafo e le tatou Maota.

Afioga Hon FAUALO HARRY JEFFREY SCHUSTER: Faafetai tele lau Afioga i le Fofoga Fetalai. E faamauina ma faatauaina finagalo uma lava o sui usufono sa sausaunoa i le auaunaga, ma e ogatasi lava saunoaga ma manatu sa faaalua ma le galuega a le Komiti Faatonu a le Fuimu, ia o le Afioga i le Komesina ma le Matagaluega. E pei o fautuaga o lo o tuuina mai, o le faatalanoaina lea o ni masini ma ni taavale mai fafo. O lo o faatalanoa ma Iapani

ma Siamani foi, se faalapotopotoga mai Siamani ni taavale fuimu fou e aofia ai tulaga e pei ona laga e le Afioga i le sui usufono mo Anoamaa 2, le Afioga ia Laufo foi lea e i ai se taavale e i ai se apefai foi lele ona o lea ua i ai tatou fale maualuluga. Ma o lo o faatalanoina foi le tulaga lena lea e i ai ituaiga chemicals ia e faaaoga e tape ai le afi lea na saunoa foi le Taitai o le Itu Agai e pei o le mea na tupu i le mu lea i tai i le uafu. Ma o lo o faatalanoaina tulaga na i le taimi nei. O lo o faamalosia mea o fire alarms, faailoilo pe a i ai se afi i totonu o fale ia e faaaogaina e o i ai tagata lautele i fale ia, faapea foi fale o le Malo.

I lalo o le Tulafono o lo o sosolo ai tapenaga a le Matagaluega e le gata i le saogalemu i mea e tatau ona i ai i fale ia e faaaogaina e tagata lautele, lea e i ai fagu ia e tape ai afi i totonu o fale e faaaoga e tagata lautele, ae faapea foi i totonu o taavale laupasese. O lea foi la mo fire alarms, e alu le asiasiga a le Matagaluega. A le pasia e faamalosia le toe fai atoa o mea ia e i totonu o fale.

I le tulaga foi lea i le... O le fautuaga lona tolu o lo o taua ai le tagai i le faia o ni fale tineimu i itumalo. Ia o lo o tagai le Komiti Faatonu ma le Komesina i tulaga ia. O lea o le a faatino nei le fale fuimu i Faleolo i fafo o le fale tineimu lea i Faleolo, leaga o le fale tineimu i totonu o le malaevaalele e le faatagaina ona faaaoga... ona o ese mai ai latou taavale mai le malaevaalele. O lea la o le a faapitoa le faia o le fale fuimu mo le atu Aana i fafo. Ae o lo o tagai foi o Anoamaa ma Fagalao, o Aleipata, Lepa ma Lotofaga, o Falealili ma le sau agai Siumu ma Safata, e faapea foi Savaii, o lo o tagai i ai le Komiti Faatonu i tulaga uma ia.

I le tulaga i pamu penisini foi ia e latalata i faleaoga ma aiga, o lo o faatulafonoina foi o le Pulega e latou te pasia. A le faia fale ia ma oo tane penisini i le tulaga e tatau ona sefe mo tagata, e le pasia foi e le Matagaluega le fai o se pamupenisini i lea tulaga.

E faamalulu atu i si ou uso le sui usufono mo Vaimauga 1, ona o la e i ai le tatou fale tineimu lea e i Apia, pei la o lea e tilotilo o lea e i totonu o le taulaga le fale tineimu, ia ma Faleata la e i gauta le fale. O lea la e tilotilo le Komiti Faatonu ma le Afioga i le Komesina i itumalo ia e i tua e le o i ai ni fale tineimu o i ai. E pei lava ona tatou silafia o le suega lava o seleni lea e i ai. A o fuafuaga a le Komiti Faatonu ma le Komesina ma le Matagaluega, o lo o tagai i tulaga ia ae faafetai mo manatu faaalua e aoga tele mo le galuega a le Matagaluega.

Ae avea lenei taimi e faafetai atu ai i le Komiti Faatonu i le Taitaifono ma le mamalu o sui usufono o le Komiti, lau Afioga i le Komesina ma le mamalu o le Matagaluega, malo le galulue. Faafetai lau Afioga i le Fofoga Fetalai.

FOFOGA FETALAI: Malo saunoa i lau Afioga i le Minisita. Ou te tapa lau Afioga i le Taitaifono mo le lafo.

Tulai mai lau Afioga i le Taitaifono mo le lafo.

Tofa ALE VENA ALE: Lau Afioga i le Fofoga Fetalai ou te faatu le lafo, *Ina ia faamaonia e le Fono Aoao Faitulafono le Lipoti a le Komiti e pei ona iloiloina:*

P.P.2022/2023 Nu.65.

Faaluaina e le sui usufono mo Faasaleleaga 2, Aana Alofi 3, Faasaleleaga 4 ma le Minisita mo Leoleo ma Tineimu.

Na faamaonia le lafo.

FOFOGA FETALAI: Ou te tapa lau Afioga i le Minisita mo le Pulega o Auaunaga Tau Tinei Mu ma Faalavelave Faafuasei.

Afioga Hon FAUALO HARRY JEFFREY SCHUSTER: Lau Afioga i le Fofoga Fetalai ou te faatu le lafo, *Ina ia faamaonia e le Fono Aoao Tali a le Malo i Fautuaga a le Komiti o le Vaega Tau le Va Fealoai.*

Faaluaina e le Minisita mo le Soifua Maloloina, Minisita mo Fesootaga ma Faamatalaga Tekonolosi ma le sui usufono mo Faasaleleaga 4.

Na faamaonia le lafo.

**P.P.2023/2024 NU.154, LIPOTI A LE KOMITI O LE VAEGA TAU
LE VA FEALOI I LE P.P.2022/2023 NU.50, LIPOTI
FAALETAUSAGA A LE IUNIVESITE AOAO O SAMOA
MO LE TAUSAGA FAALETUPE 2021/2022 – ILOILOGA**

P.P.2023/2024 NU.65, TALII A LE MALO I LE P.P.2022/2023 NU.154.

**P.P.2022/2023 NU.106, LIPOTI A LE KOMITI O LE VAEGA TAU LE
VA FEALOI I LE P.P.2020/2021 NU.71 MA LE P.P.2021/2022 NU.30,
LIPOTI FAALETAUSAGA A LE MATAGALUEGA O AOGA,
TAALOGA MA AGANUU MO TAUSAGA FAALETUPE 2019/2020 MA
LE 2020/2021 – ILOILOGA**

P.P.2023/2024 NU.98, TALII A LE MALO I LE P.P.2022/2023 NU.106.

**P.P.2022/2023 NU.156, LIPOTI A LE KOMITI O LE VAEGA TAU LE
VA FEALOI I LE P.P.2022/2023 NU.74, LIPOTI FAALETAUSAGA A
LE MATAGALUEGA O AOGA, TAALOGA MA AGANUU MO LE
TAUSAGA FAALETUPE 2021/2022 – ILOILOGA**

P.P.2023/2024 NU.99, TALII A LE MALO I LE P.P.2022/2023 NU.156

FOFOGA FETALAI: Tulai mai lau Afioga i le Taitaifono o le Komiti o le Vaega Tau le Va Fealoai.

Tofa ALE VENA ALE: Lau Afioga i le Fofoga Fetalai ma le faaaloalo tele ou te tulai atu ai e faatu le lafo, *Ina ia faautagia e le Fono Aoao Lipoti e tolu*

(3) a le Komiti o le Vaega Tau Va Fealoai o lo o tuuina atu ai ana Sailiiliga, Fautuaga ma Iugafono.

Ma le faaaloalo tele.

Faaluaina e le sui usufono mo Faasaleleaga 2, sui usufono mo Aana Alofi 3 ma le sui usufono mo Faasaleleaga 4.

Na faamaonia le lafo.

FOFOGA FETALAI: Ou te tapa lau Afioga i le Minisita mo Aoga.

Afioga Hon SEUULA IOANE (Minisita mo Aoga): Lau Afioga i le Fofoga Fetalai ou te faatu le lafo, *Ina ia faautagia e le Fono Aoao Tali a le Malo i Fautuaga o Lipoti e tolu (3) a le Komiti o le Vaega Tau le Va Fealoai.*

Faaluaina e le Minisita mo Fesootaiga ma Faamatalaga Tekonolosi, Minisita mo Punaoa Faalenatura ma le Siosiomaga ma le Minisita mo le Soifua Maloloina.

Na faamaonia le lafo.

FOFOGA FETALAI: Ua maea faautagia e le Fono Aoao Lipoti a le Komiti faapea foi Tali a le Malo i Fautuaga a le Komiti.

Ia o le avanoa lenesi o se tasi o sui usufono o le Maota e fia saunoa. Ia tulai mai le sui usufono mo Safata 1.

Afioga LEAANA RONNIE POSINI: Faafetai tele i lau Afioga i le Fofoga Fetalai ua maua foi le avanoa o lenesi itumalo e faaali ai foi se manatu i le Lipoti ua i luga o le Laulau a Fono a le Palemene. Faafetai tele i le Taitai Komiti i le latou auiliiliina o le Lipoti a le tatou Aoga o le Iunivesite Aoao o Samoa. E momoli foi le agaga faafetai tele i le Tamaitai Pule i le tatou Iunivesite aemaise le Pulega ma le mamalu o le aufaigaluega i la outou galuega aua lava le aoaoina o alo ma fanau o le tatou atunuu.

E momoli le agaga faafetai tele ona e maitau foi i le Lipoti o se Lipoti taua foi ae le tele foi ni manatu e taitonu ia, o aoga lava e ave i ai le faamuamua a le tatou Malo, o le lumanai foi lea o le tatou atunuu. O lea ou te tau autilo atu i le maitau atu i le Lipoti lea o lea e i ai le fautuaga a le Komiti i le tulaga lea i le aoga lea o le Maritime. E i ai le masini lena e aumai i le latou fautuaga e tau o le accumulator machine. O le masini lea ou te tau iloa e ese le aoga o le masini lea i le aoga lea faa-Maritime ona e tele foi lona tulaga e siitia ai le aoga lea o le Maritime. O le aoga lea a tatou lea e toatele alo ma fanau o le tatou atunuu o lo o agai ai foi i fafo o lo o maua ai galuega i atunuu mamao. Mo le silafia foi o lea lava ua tatou iloa o le aoga lea a le Maritime o se aoga e i totonu o le lio o le fava o Malo. O le latou tulaga o le latou curriculum development po o latou mea e aoaoina, ia o mea e aumai uma mai fafo e aoaoina ai, ina ia ausia uma e alo ma fanau a le tatou atunuu. A oo la ina oo ina galulue i luga o vaa, o la e

ogatasi lo latou silafia ia ma tulaga o faa... mo mea maualuga o vaa fava o Malo. A o le tulaga lea o le masini lea, pei e tau faapitoa mo tatou alo ma fanau foi lea e siitia i mea tulaga o aoga faa-Kapeteni. Ae mitamita lava le agaga i tulaga ae faalogologo foi lea i tama fanau o le tatou atunuu ae taua foi... E le gata foi o Kapeteni i luga o... O alo ma fanau i luga o pailate o i luga o vaalele, a o Kapeteni foi ia o vaa... o vaa faava o Malo. E mitamita foi le agaga pe a faalogologo atu o tau mai o Kapeteni Samoa, e le gata la i vaa faalotoifale a tatou a o vaa tetele. Ou te manatu o la e i ai foi isi alo ma fanau a tatou o lo o feoi i vaatetele o meli ma tulaga faapena. A o le mea pito sili foi lea ona taua o le tauaveina o le igoa o le tatou atunuu a o le mitamitaga foi ua au i ai tama fanau o le tatou atunuu i tulaga ia. E le gata i lea, ae ua ou maitau foi i latou totogi, e le ni tamai totogi lava ia e maua, o faamanuiaga o alo ma fanau ia. O lea la e taua i lou manatu e ave ai foi le faamuamua a le tatou Malo i mea ia o tulaga... E tele tupe a le tatou Malo, o faamanuiaga e aumai i tatou alo ma fanau ia. Pau lea o le isi au fesili faamolemole lau Afioga i le Minisita, pe ua taunuu mai la le masini lea e faatino ai aoga a le tatou aoga o le Maritime. E pei o le taua lea i lou lea manatu e siitia ai le ola aoaoina o alo ma fanau a le tatou atunuu.

Ona oo mai lea o se manatu i le tulaga tau aoga, aua o lea ua aumai faatasi Lipoti ia. O lea ou te vaai atu i le Lipoti lea a aoga o lea e aumai ai le fautuaga a le Komiti e fesili atu ai i le Taitai Komiti, o lea e faapea mai... aua e pei e le o na ma le laina o le faafitauli lava lea o lea e feagai ma i tatou o le fai mai e le lava faiaoga. A o lea e maitau atu lea e taua ai o le tele o faiaoga ua agai i galuega faavaitaimi ona o le totogi. Ia, o le mea lena e tau le oo i ai se tatou malosi o le saili manuia lea. A o lea ou te tau vaavaai atu i le tulaga lea o togi ia e tau e au ai i le tatou Iunivesite po o le FOE le Faculty of Education. Ou te le o maua lelei po o le a le agaga o le fautuaga lea a le Komiti lau Afioga i le Taitaifono, po o le mea ia siitia i luga le togi e au ai le tama aoga lea e i le Kolisi e alu ai i luga i le polokalame lea faafaioga a le tatou Iunivesite, po o le mea e tuutuu i lalo togi ina ia toatele ai alo ma fanau o le tatou atunuu ina ia fai ma tulaga e ave ma faiaoga. E fai lea i le auaunaga ona o le tele o tatou ia i le tatou atunuu e le o lava a tatou faiaoga.

Lona lua, o lea ou te vaai atu i le Lipoti lea i le tulaga i le mea lea o le vaimama...vaimama o lo o taumafaina e alo ma fanau aoga. O lau faafesili foi lea o le a se tali mai i aofaiga uma o aoga i totonu o le tatou atunuu po o fia ni aoga o la e inu uma i le vaimama lea a le tatou Malo? A o ai foi ni aoga o lo o taumafa tamaiti aoga i vaitumaoti aua o lea ua tatou iloa o vaitumaoti e le o oo i ai le malosi o le tatou Faalapotopotoga lea o le Suavai o le Samoa Water Authority. Pe ua faamanino aua e le iloa po o i le isi mea o lea e tele ai le faamai, mamai ai alo ma fanau ona o le taumamafa i vai le faamamaina po o le vai foi lea ua i ai le vailaau e maua ai le vaimama i le soifua maloloina.

Ia o nai fesili ia ma le agaga faaaloalo. Faafetai i lau Afioga i le Fofoga Fetalai.

FOFOGA FETALAI: Malo faafetai. Malo saunoa. Tulai mai lau Afioga i le Sui Taitai o le Itu Agai.

Tofa Hon LAUOFO FONOTOE NUAFESILI PIERRE LAUOFO:

Faafetai i lau Afioa mo le avanoa. O nai fesili ia i le Afioa i le Taitaifono o le Komiti e fia maua ai se malamalamaaga. O le Lipoti a le tatou Iunivesite Aoao, o lea e maitauina i le Itulau e 4 o la outou Lipoti, o le tupe faaaluina i totogi o le aufaigaluega. O le tausaga 2020/2021 e \$18.1 miliona tala na faaalu ai. O le tausaga na sosoo ai, o le tausaga lea o lo o talanoaina i le Lipoti lea e pei ona outou aumai e 2021/2022 ua sii i le \$19.3 miliona. O lona uiga e tasi lava le piriota ae sii i le \$1.2 miliona le tupe faaopoopo i totogi o le aufaigaluega. O le a se faamaninoga o lea tulaga, o le tele ia o lea vaega seleni ua faaopoopo i totogi o le aufaigaluega. E faapea foi la le pili po o le totogi o le Okika sa ia okikaina tusi a le tatou NUS. O le tausaga 2020/2021 e \$35,000 lana pili, a o le tausaga lea e pei ona aumai e le Lipoti lea o le 2021/2022, ia, o lea ua sili atu po o ua ova atu i le \$50,000 le pili a le Okika. Ona e mafua na ou fesili pe tasi lava le piriota ae leai lava se suiga tele i tulaga masani i le suiga o galuega ma tulaga faapena ua mafua ai ona tulai mai le tulaga lea... O le tulaga lea e fia manino ai lou sui usufono. Ia, ae faapea foi le tulaga o le tupe faasoa a le tatou NUS, pe fia se tupe o vavae pe faasoa agai i le tatou aoga lea o le Maligi, po o le Maritime pei ona saunoa ai le sui usufono mo Safata ua mavae atu. Ona o lau asiasiga talu ai nei i i, ua tele lava le galuega e toe fia faaleleia po o le maintenance work e fia faia i fale ia. E faapea foi se fesoasoani i tulaga o faiaoga faapitoa mo lea foi ituaiga matata. O le taua ia te au o le aoga lea ona o le toatele o tamaiti e iu i le aoga lea o le Maligi e maua lava galuega. O lo o maua lava galuega i le tatou kamupani lea o le SSS. E pei o le tulaga lena e ave ai lau faataua i le aoga lea.

O le tulaga lea po o tumau le faiga lea sa fai i lalo o tulaga pei ona aumai i tausaga ia, o lea sa maua ai le pau i le registration po o le enrollment fee, le resitala foi lea ulufale i le tatou NUS lea na faapau le \$200 mai le resitala ae tuu i tua i le tau o mataupu, totogi o mataupu. O le fautuaga, ae a pe a faataatiaese lena \$200. Afai lava ua faapau le \$200 i le totogi ulufale ia faataatiaese loa ae leai se mea o le a toe faaopoopo ai i tua i le tau o mataupu.

O le saunoaga a le sui usufono mo Safata lea pei ona... tulaga i le tatou aoga lea o le Maligi, le masini lea sa taua i le saunoaga a le sui usufono lea e aumai i le Lipoti a le Komiti, e taua lava le faasao ona o lea foi sa taua ananafi, ina ia faasao mo faamaumauga a le Maota. O lea e aumai mo le accumulator machine, a o le sao o le igoa o le masini o le simulator machine. O lea e faasao mai e le Tali a le Malo. Faafetai i lau Afioa i le Minisita o lea e aumai lau tali o lea e faasao mai ai le igoa o le masini o le simulator ae le o le accumulator. Ae maitau atu, o se masini taua pei ona saunoa le sui usufono mai Safata e taua tele le masini lea mo aoga a tatou fanau i le tatou aoga o le Maligi.

E fia faamauina foi le faafetai i le Lipoti a le Komiti e tusa ai ma le Matagaluega o Aoga. Le Matagaluega o Aoga, o le mea lea e maitauina i le Lipoti a le Komiti o lea e aumai i ana sailiiliga, sailiiliga a le Komiti o lo o maua ai le faaletonu o auala o fesootaiga, school net broadband highway i aoga tulaga lua ma kolisi i nuu i tua o le atunuu ma Salafai. E taua le faaleleia o tulaga ia pe afai e le i faaleleia aua o tausaga ia tatou te talanoa ai o le 2021/2022 ma e tatau ona faaleleia tulaga ia o le school connectivity ina ia fesoasoani ai

Ia i le tuuina atu po o le momoliina atu i tua e faaaoga ai le internet o mea o aoaoga ma lesona, aemaise aoga e le o lava faiaoga pe le o maua foi faiaoga e aoaoina mataupu faapitoa. O lea e aumai i le Lipoti a le Komiti o la e maua isi aoga i tua, o faiaoga o aoaoina e faiaoga e le o se latou mataupu le faasaienisi a o la e aoao le faasaienisi i isi vasega. Ia, ou te le iloa la pe faafefea ona fai lea ituaiga aoaoga faapea o le alu atu o le faiaoga e le o sana mataupu le faasaienisi ae alu atu ao le faasaienisi i tamaiti aoga i le mataupu faasaienisi. Ia, ae o lo o tumau pea le tulaga lea pei ona aumai i le Lipoti a le Komiti o le lava o faiaoga. Ia e talitonu sa saunoa foi lau Afioga i le Minisita i isi foi tatou fonotaga, e le o se mataupu faigofie ae le o se mataupu fou foi. Ua leva, ua leva le mataupu lea ona lea foi sa taua ma aumai i le Lipoti ona e tele lava faiaoga e tuua le galuega ae agai i fafo i galuega faavaitaimi, ia aemaise lava isi ituaiga galuega, omai galulue i totonu o le Malo po o tua foi. Ae le na o faiaoga foi o lo o aafia i le mataupu lea. O lea foi e aafia ai isi galuega pei o tamaiti tausisoifua. O lea e maua mai Lipoti pe i ai foi nisi o leoleo ua o i galuega faavaitaimi ma isi ituaiga i atunuu e mamao. O lona uiga e le faigofie ae taua lava ia au le manatu lea e faatu mai e le Lipoti, o faiaoga foi ia ua retire afai o maua le malosi faaaauau pea, tuu ai pea le avanoa e faaaauau ai le latou tautua. Aua o la e maua lo latou malosi e fesoasoani ai i le lava o faiaoga.

Ia, ma le mulimuli la i le Lipoti mulimuli, o le Lipoti lea 2021/2022 a le tatou Matagaluega, o lea e pei o lo o aafia mai ai fanau laiti foi ia lea e faatau a ia... faatau savali oloa i le taulaga, ia ma le compulsory education. O le fesili la i lau Afioga i le Minisita i le tulaga lea o le tatou compulsory education aua atonu o nai nei fanau laiti o lo o fia maua se fesoasoani. O lo o fia maua se fesoasoani i latou aiga i nai seleni aua le tausiga o aiga ma fesoasoani foi i matua ae o lo o fia maua se seleni. Ia, e faapea foi le tulaga o tupe manaomia mo latou aoga. O lea la e pei ona tatou vaai ai i le tele o nai isi fanau o lo o faatau solo nai oloa laiti i totonu o le taulaga o Apia. Ia, ae taua lava ia au ma lou sui uufono i le o pea i aoga, o pea i aoga ina ia o pea latou ma taumafai a latou aoga ina ia maua le faamanuiaga lea ma maua le tomai, ina ia avea i latou ma tagata matutua, ae ua lava foi le silafia ma le atamai e maua ai nisi galuega e sili atu le lelei aua le tausiga ma le fesoasoani i aiga.

Ia, lau Afioga i le Fofoga Fetalai, e faamuta ai i se manatu. O nai motugaafa na i lau Afioga i le Minisita ma le Taitaifono. Faafetai mo le avanoa.

FOFOGA FETALAI: Faafetai. Malo saunoa faafetai. Ia, tulai mai lau Afioga i le sui usufono mo Vaimauga 1.

Afioga SULAMANAIA FETAIAI TAUILIILI TUIVASA: E momoli le agaga faafetai i lau Afioga i le Fofoga Fetalai, Afioga i le Minisita aemaise foi o le Minisita Lagolago, aemaise foi o le Taitaifono ma le Komiti, aemaise foi o le Pule o le NUS, ia aemaise foi o le Faauluuluga o le Education. Ia faafetai lava i lau Afioga i le Minisita ona o oe foi sa e... E le gata o le Pule Aoga, Asiasi Aoga, o le Faiaoga e faapena foi i lou soatau. Ae avatu nai fesili ona o le... E pei o lea ua aumai le faasaoga o le mea lea o le masini.

O le tulaga o le faanoanoaga o le sui usufono ona o lea e aumai e pei ua le ofi le masini i totonu o le potu. E pei la e tau faanoanoa ai, e fai lava la lena fale i tai a o lea pei e... pei o lea e aumai i le Lipoti o lea ua uma ona fai le fale lea e Saina ia ae le ofi le masini i totonu. E pei o le agaga lena o le tau faanoanoaga foi lea ona o lea pei ua toe o ai tatou tupe e toe faatau mai ai le masini.

O le lona lua lau Afioga i le Fofoga Fetalai, e leai se isi e faatauagavaa i o i le tatou Maligi, ae sa i ai lava le manatu e manaia pe ana faapea e amatamea mai se masini faapea e ave i gauta i le NUS. Ia a o lea e pei e faapena le fua foi o lenei usugafono.

O le tulaga i le Ofisa o Aoga e momoli lava le agaga faafetai pei ona saunoa foi nisi o sui usufono i mo mea o faiaoga faapitoa. Ia pei e avatu foi lata ita lagolago i le tulaga lena ona o lea e pei ua sioki nai tatou faiaoga aemaise le tulaga lea o le faasaienitisi aemaise o le numera. E pau lava lata ita tatalo i lenei Maota ina ia mafai ona tuu i luga totogi aua a tuu lava i luga totogi e le mafai ona toe o ese. E faapena e tau masaga ma le faiaoga ua tuua latou faiaoga ae o atu i galuega faavaitaimi. Ia o le aiatatau lava lena a le sui aua e le mafai ona alu lava e faiaoga a o la e vaai atu i le le aoga foi lea e next door ua lua taavale, fai le fale. A o lea e amo lava le ato ma le peni ma le penitala... ia... a lea faapena, tiai loa le faiaoga ae alu i le galuega lea. A o le fesoasoani ma le tuualalo, pe le mafai ona fai se bond ina ia mafai ona aua ne i alu ese i le taimi e uma mai ai, pe lima tausaga. Ia, a uma loa serve lava faapena ia ma toe tuu i luga nai totogi. E le o po se lilo ona o Ekalesia foi ua faapena foi ona ua tuuitiitia tupe foi nei e faamatuu atu i aoga. Ia pei ua tau faapena ua le lava ai foi le faasoa i totogi o nai faiaoga aemaise a Ekalesia a le lotu. E pei o le tatalo lena.

O le isi e avatu le fautuaga i lau Afioga ona o mea ia o sikolasipi, e le o po se lilo o lenei foi itumalo o le tele o nai alo ma fanau la e le i o. O lea foi faatoa maua tala faapea faatoa o i le second semester ia pei o le agaga lena, manaia lava le mea sa i ai, e uma loa omai loa faatauto ma e ua agavaa ia o loa i le amataga o le tausaga. Ia o nisi la lea e faapena ona o le tele foi o tulaga i faiga faavae ma faapena, ia ae tatau ona o nai tamaiti, lea la faatoa o atu nei isi po o Iuni i le second semester ae ua le o i le mea masani. E pei o le agaga lena.

E momoli le agaga faafetai i lau Afioga i le Minisita i le faamamaavega lea e aumai mo mea o resitala. Ae o lenei itumalo e tatalo atu ona o le itumalo lenei e ave a le faamuamua i alo ma fanau ma le tulaga i aoaoga. E le i maua atu le matou \$1 miliona lau Afioga i le Minisita, pe le mafai ona exempt mai le Vaimauga 1 i alo ma fanau i le NUS. Po o le a le taimi e maua mai le matou \$1 miliona muamua ia ona totogi atu ai lea o pili o alo ma fanau o lo o aoga i gauta aua o lea e faapea o lea ua toe extend le pili mo alo ma fanau. Ia pei o le agaga lena.

O le va o aoga ma Komiti lau Afioga i le Fofoga Fetalai, e tau feteenai le tulaga i... e pei e le o po se lilo, o Komiti o afioaga e pei o lea e o ifo e puipui le aoga ma latou iloa le faagaoioiina o le aoga po o... Ia ae pei o isi aoga aemaise foi o le... o si nei foi... ia ua pei ua pule lava le Puleaoga ia ua leai a se tulaga e vaai nai Komiti aemaise lava le faagaoioiina o le grant. E toe fia maua ai se faiga faavae leaga o le mea sa i ai lau Afioga i le Fofoga Fetalai, lau Afioga i le Minisita ia e pei e feagai faatasi le Puleaoga ma le... Ia ae ua talanoa

mai matou Komiti fai mai le Puleaoga e leai lava se feau a le tou Komiti, o le Puleaoga lava e feagai ma le Ofisa o Aoga.

E pei o le agaga lena e fia maua ai se faasaoga po o ua sui le faiga faavae, ua le toe aia e le Komiti lea o le Aoga le aoga e tusa ai ma le faiaoga i le puleaoga.

Manuia le fonotaga lau Afioga i le Fofoga Fetalai, pau lena o nai mea na manao i ai lenei itumalo.

FOFOGA FETALAI: Faafetai. Malo faafetai mo fautuaga. Tulai mai le sui usufono mamalu mo Faleata 3, malie lau Afioga i le Taitai o le Itu Agai.

Tofa LEALAILEPULE RIMONIAIAFI: Faafetai lava i lau Afigoa, e vave lava sou manatu. Faafetai tele lava i le Komiti aemaise foi le Afioga i le Minisita. Pau lava le mea lea e fia tulai atu ai, lea ua i ai nai vaega ua faasao. O lea e fia fesiligia lau Afioga i le Taitaifono i le TV lea a le NUS lea ua aumai i i ua commercialize. Ou te fiamalamalama po o le a le laisene lena e operate ai, aua o lona uiga a alu loa faapisinisi, o lona uiga e muamua sui le laisene toe o le a taugata foi la le mea e totogi. Aua manatua e totogi agai i le Digital TV le tulaga o mea ia. A o mea ia na avatu ai o laisene faapitoa lava o mataupu tau aoga.

O lona lua, o lea e tasi lava le tou fautuaga na aumai i le NUS i le masini lea, ia e le tele foi la se manatu aua sa faapea e tele ia... Ae i lou talitonuga lau Afioga i le Minisita i le faafitauli tele lea ua tupu i Samoa i mea o laau faasaina, drugs, e tatau lava ona fai se faiga faavae a Matagaluega i mea nei. O au lea ou te Peresetene i le Samoa College, leva ona ou Peresetene ai. O le tasi lea faafitauli lea e maitauina nei, a tatou le titina i lalo i le level lea, i lalo i aoga ia e le mafai ona... o le a tupu tele le mea lenei. Amata mai i ina lea ua oo i Matagaluega a le Malo e tatau ona ave i ai se faamuamua a lau Afioga i faiga faavae i le tulaga lea.

O le isi vaega o lea e aumai i le fautuaga a le Komiti i fesootaiga a le Matagaluega o Aoga ma le NUS, FOE le Faculty of Education. Ae le o aumaia la se fautuaga i le Pepa a le NUS a o lea e aumai i totonu o le Matagaluega o Aoga. Sa tatau ona aumai i i le Iunivesite Aoa ina ia toe tagai i latou i le entrance lea i totonu aemaise tatou polokalame foi ia na fai nei, ua le maua le igoa o le mea, lea sa fai faavavevave ai faailoga aemaise lava i le Science mo le agai i luma.

O le isi fautuaga lea a le Komiti lau Afioga, o mea ia o taaloga faaleaganuu. O lou lava sui usufono ma lou talitonuga, manatua e fai culture days a Aoga, faaleaganuu ia lava le taimi lena e fai ai. Ae o lou lava talitonuga tatou o e atiae taaloga ia ua alu agai i ai le lalolagi ma manuia ai tatou tamafanau, kirikiti palagi, lakapi ma isi tulaga faapena, i lou lea talitonuga.

Ona oo mai lea i le mea mulimuli lea lau Afioga, i le compulsory education, ia aemaise nai tamaiti ia e faatau savali mea i le auala. E eseese lava finagalo i lea mataupu, ae o lou lava talitonuga mai lava i le amataga, o le Tulafono la e i ai, school hours. Ae o lou talitonuga e tatau ona alu lava le Tulafono lenei ia oo atu i le afiafi. E le gata i lea, o mea e faatau. E le afaina, o tatou uma lava na maua avanoa e faatau ai faasavali mea o fai o a mea sa maua i laufanua i aso ia.

A o le mea lea ua i ai nei, o lau tala lava lea e masani ona fai i tamaiti nei, o le mea lea e tau e outou i tagata mai fafo o tatou o le atunuu faipepe, se i tulou, ma le atunuu le taele. Aua pau a lea o mea ia e faatau e le toatele, na o le mea vilitaliga ma le pulutaele, e le se tala sese le mea lea.

Ou alu atu la i le vaiaso na tea nei, o le tala moni e le o se... o le a afa le iva, pogisa le auala i Vaitele a o savali le tamai tamaitiiti lava, ou tu loa oso mai i totonu. Fea sa e i ai? Fai mai, sa faatau au mea vili kaliga i gakai i faleoloa ia e i gakai. Fea e ke gofo ai? Ou ke gofo i uka i o i Vaikeleuta, ta o e momoli oe. Fia ou kausaga? E 11. O fea e te aoga ai? Ou te aoga i Vaigaga. Ou fai atu ua e vaai o le a ta le 10 i le po o lena e te fealuai e fai nei mea? O fea ou matua? La e i le fale. Ta o. Ma o atu lava ma o i totonu o le fale oso mai le isi tamai teineititi. Fea matua o le tama lea? La e bingo. O le tala lena la e silasila le Atua i lau tala lea. Ae na ou alu atu e fai sau tala i ai, fai se aoaiga. Ou fai atu, fai i ou matua ou te toe sau taeao. Ia vaai i le mea lea e fai i le alofa i lenei tamaititi laitiiti, tuli e faasavali ia... a o lea ou te sau o lea e o e bingo. E lelei pe a o faalogologo mai. Ou te toe alu atu i le isi aso ua loka le pa. Ia, ae i lou talitonuga lau Afioga i le Taitaifono ma le Minisita, manaia o lea ua i ai Komiti faale-itumalo ma o nei faafitauli a ta alu atu i Savaii e seasea ota vaai i ai, ae pei lava o i inei i le taulaga ma i ia matou i Faleata, ae faafetai o lea ua tulai mai si ou uso vaeane le Igoamatua aua o maua lea e i i, ia o lea foi e fai i ai le galuega. Ae leaga o lea foi ua tausisi mai latou i le latou aiatatau ma taimi ia ae ua tatau ona toe tilotilo e faamamalu le mea lea. Ma le faaaloalo lava, faafetai.

FOFOGA FETALAI: Malo faafetai, malo saunoa. Ia o le tatou toe lauga lea o lea itu lau Afioga i le Taitai o le Itu Agai.

Susuga Hon TUILAEPA FATIALOFA AUELUA SAILELE MALIELEGAOI: Lau Afioga i le Fofoga Fetalai, e le umi foi se manatu o lea ua cover uma e saunoaga nisi o mea sa naunau i ai. Ae o le vaega muamua lava, faamalo i le Komiti faamalo foi ia i latou o galulue. Faafetai i lau Afioga i le Minisita o lo o nafa ma mataupu faapenei faapea foi Ofisa Sili o Pulega.

O le mataupu muamua lau Afioga i le Fofoga Fetalai, o le fautua atu i le Matagaluega o Aoga ia faapea foi lau Afioga i le Minisita i le tupe lea e faasoa i tua i Aoga. E matua moomia lava e aoga lea i tua aemaise lava aoga a Ekalesia le vave oo atu o le tupe lenei ia Fepuari. O le tatou faiga faavae faatoa release le seleni po o Me po o Iuni, ae a mafai ona release tupe nei ia Fepuari o le matua moomia e aoga a Ekalesia le tupe lenei ina ia vave atu. O lea e i ai aiaiga foi i le lipoti mai o le faaaogaina tatau o seleni na avatu, leaga e i ai Komiti e maua atu ua puletoatasi ai le Taitaifono. Ae lelei ona se i toe silasila ane lava i le mataupu lenei o le vave ona faamatuu i tua i aoga a Ekalesia ma isi foi aoga le seleni lenei o le foai a le tatou Malo.

O le vaega lona lua lau Afioga, o sikolasipi ia a le NUS mo tamaiti. E faatoa faasalalau mai sikolasipi nei po o Iuni ea po o Iulai sa tatau ona taumafai e faasalalau mai i le amataga ae talosaga atu i ai fanau. Atonu o i ai ni mafuaaga tatau i le itu lea o le siaki muamua o records ae faaoga pea a latou maka foi o avatu ai ma interviews e faavae ai se faiga ina ia vave ona aumai sikolasipi ia i

tua mo fanau o lo o moomia ma faasaoina ai foi nisi o matua e le o mafai ona maua se fesoasoani mai seleni ia e faasoa atu i tua e le tatou Malo.

O le vaega lona tolu lau Afioga i le Fofoga Fetalai, ou te fia fesili atu po o le a le tulaga o i ai le tatou faletusi lea. O le faletusi lenei i le taimi sa faatalanoa mai ai ma se tasi foi o Polofesa o le Iunivesite i New York i le tasi o ana asiasiga mai i Samoa nei ma ofo ai, fiafia i le atunuu lenei. Na aumai lana ofo lena, lea la sa talia e le Malo na manatu ai lea i se mea e faatu ai ma filifilia ai le NUS e faatu ai. Sa moomia foi se seleni tele e amata faatino ai galuega lea na ave ai i le Malo o Initia ma aumai ai le latou \$1 miliona tala e faatino ai galuega. O le faamatalaga na tuu mai i le tatou Malo i lena taimi, pau lava lea o le ituaiga Library e maua i lenei itulagi o le Pasefika, le maoae. The most modern technology o lea e faaoga ai e mafai ai ona tatou access ina so o se library i le lalolagi, e access atu lavainei Samoa. O le mea la lena lea na ala ai ona filifili le NUS, e lelei ona ave pea e tuu i totonu o le NUS e aoga mo fanau aoaoina a Samoa ae tatala pea le avanoa ia i latou e fia faaoga. Faamolemole po o le a le tulaga lea o lo o i ai le tatou library?

O le itu i le tulaga lea o faiaoga i tua, e manatu e le tataua ona tatou toe oo i le mea lea o le sioki o faiaoga. E tele le galuega sa tatou faia i le aoaoina i le mataupu lava lea o le Science sa afaina ai tatou. Se i toe silasila totoa pea ona o lea e faalogo atu pea ua i ai nisi mafuaaga ua sioki ai a tatou faiaoga. O lea foi ua uma ona saunoa nisi e tataua ona toe tilotilo i le tatou policy ia i latou ua litaea a o la e i ai le poto masani e mafai lava ona fetuunai le tofa i le aiaiga o lo o i ai na o i latou e fai tikeri. Se i silasila pea i ai i le tulaga lea o le toe fetuunai. O le upu lava lena a le atunuu o le uta fetuunai, fetalai, o le uta a le poto.

Lau Afioga i le Fofoga Fetalai, o le taimi lea... e faafetai atu ona o lea lava ua faatino le tele o tatou manaoga sa faaalua i aso ua tuanai, ia liliu le Iunivesite lea i Alafua ia le na o mataupu tau faatoaga e aoaoina ai, ua matua gauaano ai le Iunivesite i le tele o le tele o le investment lea ae tau leai ni tamaiti o la e ua faatu Iunivesite faatoaga a Fiti latou, faatu Iunivesite faatoaga a isi atunuu, sa tataua ona omai uma iinei, ae ua le omai. O lea la ua gauaano ai i nei mau mea ua fausia i Samoa nei, a o le fiafiaga o lea ua liliu nei o le General Campus, o lona uiga, so o se faailoga e faia iinei, a o le tulaga lava tau tupe e faalagolago i ai. E le faapea la ua oo i le taimi e atoatoa ai, o lea e amatamatamea. Ae i ai le manatu e taua tele le galulue faatasi o le tatou iunivesite ma le iunivesite lea, e silasila i mataupu e tataua ona ave i ai le tatou malosi i le NUS, ona e i ai foi le faafitauli o le NUS latou i le tulaga tau tupe, e sioki foi tupe a le NUS latou. Ae lelei ona maximise a tatou resources ona tilotilo lea po o fea le mea e tuu i Alafua o lea e i Samoa nei, a o fea le vaega e tauave e le tatou NUS.

O le tulaga i taaloga, e taua tele le itu lea, ma e faafetai foi i le Malo i le faaauau pea o fesoasoani nei. E taua foi le finagalo na faaalua e le Palemia, e ogatasi lelei lava ma manatu e ave pea e le tele o tatou Faalapotopotoga nei ia i latou o faiaoga. O le faafitauli lea e tupu i faiaoga, po o le a lava le ituaiga taaloga, lakapi, kirikiti, e tau agai lava manatu ona o le fia malo e ave ai latou la e ola i fafo ona o le fia malo. A o lea ua faamaonia i le tatou Taitoafitu, o le a le masomasoa ma le malolosi o au taaalo i isi atunuu, ua mafai e tatou tama

fanau ona sosoa le malosi lena i le mea leni o le lotonuu. Ma e taua tele le itu lea e tuu atu ai se tuualalo, faaauau le polokalame lea a le Matagaluega o Aoga i le faaauau pea o tauvaga lakapi lea a tamaiti laiti, e amata atu lava i lalo na o le pasipasi ae oo atu i luga ua amata ona faaopoopo. Ua 12 tausaga talu ona faagasolo le polokalame lea.

FOFOGA FETALAI: Toe tasi le minute o le sui usufono.

Susuga Hon TUILAEPA FATIALOFA AUUEA SAILELE MALIELEGAOI: Ae ou te lagona foi, o le ala lena o lea ua ou vaai atu i le tulai mai o tama taaalo a le tatou atunuu ua matua lelei lava tama taaalo, ae le o aveesea foi le taua o le finagalo lea, e tataua lava ona tatou taumafai tatou ia toatele a tatou tamafanau. Aua o lea e 100 pasene le loto, le loto finau. A o isi ia e omai mai fafo, ua i ai a latou konekarate ua le o toe taaalo 100 pasene a ua taaalo ma le faamoemoe e aua ne i lavea, e le maua ai se manumalo o Samoa i tulaga ia, ma e tele le taumafaiga o lo o fai nei. E ui o lea sa tatou mitamita uma lava i le taaloga o le Lakapi Liki, ia o tama uma lava i fafo. A o le taaloga lea na matua tatou oo ai lava i le maoae o le tautaua o Samoa i taaloga nei faava o Malo. Faafetai foi ia i latou o tamafanau a le atunuu o lo o taaalo i fafo ae omai aumai le latou loto atoa ma le agaga atoa ina ia siitia le taalo tauleleia i le tatou atunuu.

Lau Afioga i leFofoga Fetalai, o nai manatu na e faaopoopo atu i le galuega fita o lo o faafeagai ma i latou o lo o faia nei mea i le tatou Malo i Minisita faapea foi Ofisa Sili o Pulega o Matagaluega.

FOFOGA FETALAI: Malo faafetai. Tulai mai lau Afioga i le Taitaifono.

Tofa ALE VENA ALE: Lau Afioga i le Fofoga Fetalai ou te tulai atu ma le faaaloalo tele e taumafai e tali atu i nisi o saunoaga a sui usufono, aemaise le paia ma le mamalu o sui usufono o le Palemene sa sausaunoa i Lipoti nei e tolu (3) a le matou Komiti. Ia ma e momoli atu le agaga faafetai i saunoaga foi a sui usufono sa sausaunoa, ma o le a taumafai atu le tali atu i mataupu foi na laga.

O le mataupu na laga e le Afioga i le sui usufono mo Safata, lau Afioga i le sui usufono mamalu, o lo o maua uma lava e aoga uma le suavai mama, e faapena foi i le tatou aoga i le motu tele i Salafai ma le talafatai i Upolu nei. A o le tele foi o nisi o mataupu sa sausaunoa i ai sui usufono, aemaise lava i le itu lea i aoaoga.

Lau Afioga i le Sui Taitai, o lou finagalo e te fesiligia ai tulaga o le siitai, ia e te silafia lava o oe foi o le loia, a i ai nisi galuega faaopoopo a le Iunivesite i le audit ina o latou tusi, ia e faapena, e le faapea e tumau le pili a le audit a o la e siitai tulaga o galuega e momoli atu e le Iunivesite. E pei o le tulaga lena pei ona fesiligia foi e lau Afioga. Ia o nisi foi o sui usufono mamalu aemaise le mataupu lea i le le lava o faiaoga. O le mea mautinoa lava le paia o lau Afioga i le Fofoga Fetalai ma le faafogafoga a le tatou Palemene, e matua le lava lava faiaoga. O le mataupu lava lea e momoli mai pea e le Afioga foi i le Pule faapea foi le Pulega, ona o le le lava o faiaoga. O le mea lea e tulai mai nei i le taimi

lenei, o le tele o tatou tagata ia e aoaoina faafaiaoga, e pei ua o uma i galuega ia faavaitaimi. E tatau foi i le tatou polokalame lea i le galuega faavaitaimi ona silasila lelei ia i latou nei e i ai tomā faapitoa. Ia ma le isi itu, o nisi o i latou ia pei foi ona sa i ai le aoaoina faasikolasipi, a foi mai e le fia o e faiaoga ae apply solo i isi galuega a le Malo, ona o le taumafai lava... o le totogi, ou te iloa lava o le totogi le mea e le o... o lea la e taumafai foi le Matagaluega ma le Minisita foi o Aoga ina ia silasila i ona itu uma ia, e mafai ai ona siitai totogi o faiaoga, ina ia mafai ai ona uunai mai le agaga o alo ma fanau foi a le tatou nuu e fia aoaoina e avea ma faiaoga, ina ia toatele ai ni faiaoga e gafatia ai le tulaga lea e pei ona i ai le mataupu lea i le short o tatou...

O le mataupu lea lau Afioga i le sui usufono mo Faleata, o le tatou TV, ia e leai o lea lava e alu i le laisene lea e tasi e le o suia lau Afioga. E pei o le mataupu lena o lo o fesiligia e lau Afioga. Ia faatasi ai la ma nisi o mataupu e pei ona sausaunoa ma fetalai i ai nisi o sui usufono mamalu o le Palemene i le itu lava lea tau i aoaoga. Ou te iloa o le a i ai se taimi e saunoa ai le Afioga i le Minisita e faapulapula ai nisi o mataupu e talifuaitau atu ai i fesili sa laga e sui usufono mamalu. Ia ma le faaaloalo lava lau Afioga i le Fofoga Fetalai.

Malo saunoa i lau Afioga i le Taitaifono. Se i tulai mai lau Afioga i le Minisita.

Afioga Hon SEUULA IOANE: Lau Afioga i le Fofoga Fetalai, e muamua ona ou faatulou ma faaaloalo i le paepaega ua uma ona e saunoa i ai i le taimi ua sola, e le gata o le ituvai a le Malo, le ituvai faaleaganuu, a o le ituvai foi a le au nonomanu aua manuia o si o tatou atunuu. Malo faafetai.

Ae le i faia se faamatalaga, e tu lava ae lili'a i le saofaiga a le fonotaga a le Palemene mamalu nei aua le afio o lau Afioga i le Fofoga Fetalai, aemaise foi le usugafono mamalu a le Palemene. Le afio o le Afioga i le Palemia faapea lana Aufono.

Ou te muai momoli le faafetai ma le faamalo i lenei usugafono, e ui lava e le i tele ni sui usufono na saunoa ma afea i o latou finagalo le Matagaluega o Aoga ma le Iunivesite, ae i lou lava talitonuga toatasi, e leai ma se isi e aluese sona finagalo i mataupu pei ona faailoa.

Ou te faafetai foi i le Komiti, lau Afioga i le Taitaifono ma le mamalu o le Komiti aua o lo outou faamaite ma la outou lagolago ua mafai ai ona aliae nai isi mataupu mo le faaleleia o le itu tau aoaoga i totonu o si o tatou atunuu. Faafetai le timata, faafetai mo fautuaga ua mafai ona faailoa ma ua folasia i lumamea.

E i ai nai vaega ia ua saunoa i ai le Taitaifono o le Komiti, ma ou te talitonu o lea ua pau atu ai so outou matupalapala o le a ou le toe oo i ai. Ae na o nai vaega lava ia e tapena i ai se faamatalaga, o le fautuaga lava ina ia lelei le connectivity o le fesootaiga o aoga. O le taimi nei o lea ua galulue faatasi le Matagaluega o Fesootaiga ma le Matagaluega o Aoga e faatu se Komiti ina ia maua le sootaga lea o le galulue faatasi ina ia mafai foi ona fesoasoani mai le technology latou i le aoaoina o alo ma fanau a le atunuu. Peitai, e le o mafai ona faalagolago tele foi faiaoga ma le Matagaluega i le auala lea, o lea lava e tamau ma mausali lo matou talitonuga, o le auala lava lea na tatou aooga mai ai i aso ia a o tatou laiti, o lea lava e faaauau. E ui e taua tele le tekonolosi i lenei vaitau e ono foia ai foi

nisi faafitauli e pei o le laitiiti o le numera o faiaoga. Ma ou te iloa o se mataupu ogaoga lea.

Lau Afioa i le Fofoga Fetalai, e le o nofonofo ai foi le Matagaluega i le tapenaina o nisi auala e mafai ai ona tau talitali mai i faafitauli o le le lava o faiaoga. Ona ua uma ona i ai foi aiaiga ma faataatiaga a le Matagaluega latou i le faasoaina o faiaoga, e pei o le auala lena o lea foi e mulimulitai ai le Matagaluega i lana faasoa. Peitai, e i ai foi nisi taimi e le mafai ai ona tumau pea le faasoa i le tilotilo atu i le manaoga ma le moomia o le mea e tataua ona i ai i lea taimi ma lea taimi.

Sa saunoa nisi i se auala e taumafai ai ina ia taofiofi mai a tatou faiaoga. E moni lava e i ai nai faiaoga ua o ese i galuega faavaitaimi, ae o lenei taimi ua le toatele e pei na gata i le amataga, a o lea lava e fai ma o ese faiaoga. Peitai, o le agaga maualuga ia faatosina alo ma fanau a le atunuu ina ia omai e galulue foi i lea itu taua o le Malo aua le atinaeina o alo ma fanau a le atunuu. O le taimi nei, o lo o faatalanoa le PSC ma le tatou Matagaluega ina ia faaoa lelei faiaoga i le itu tau totogi.

O le galuega a faiaoga, fai mai le isi tagata e laitiiti le totogi. I le taimi lenei ina ua fai le upgrading lea a faiaoga, na ona uma mai lava o au pepa o le upgrading, kiki loa oe i le \$31,000 i le tausaga. O lona uiga o se isi foi faatosina lea i tamaiti aoga, e tele tausaga e te galue ai i isi matata faatoa maua le galuega, a o le faiaoga, na ona iu mai lava o le FOE sau loa faiaoga loa ma maua le totogi e faasoa aua le lumanai manuia.

O le vaega lea na saunoa foi i ai i le uiga lea e faapea ua aoao e nisi faiaoga le faasaaienisi ae leai so latou tomai, ia te au ia faafaiaoga, ou te le talitonu tele i ai i le mea lea. Manatua foi a o tatou aoga mai, sa tatou aveava lava le mataupu lea. Tatou omai i kolisi, tatou omai i le iunivesite i le aoga faafaiaoga, o la e lava e ave, e compulsory le aveina o le pepa lea o le science. Seiavagana lava ua oo i le level maualuga ona utiuti ai loa lea i ina o tamaiti po o faiaoga latou te tauaveina. Ae i le lautele lava ia, e science uma lava faiaoga ua aoaoina uma i vaega o le galuega lea faasaaienisi. Ae ona o kolisi ua i ai foi le tulaga lea ua utiuti tamaiti e ono fesoasoani i le itu lea. Ae o lo o tilotilo lava i ai le Matagaluega e faatosina tamaiti ina ia toaaga e omai e aoga i le saienisi ma faafaiaoga ai foi latou.

Ona ou oo mai lea i le Vaega lea o le Komiti o Aoga, o se vaega taua tele...

Susuga Hon Tuilaepa Fatialofa Auelua Sailele Malielegaoui: Lau Afioa i le Fofoga Fetalai e tasi lava si tamai mea lea...

FOFOGA FETALAI: Malie lau Afioa i le Minisita se i tulai mai le Taitai o le Itu Agai.

Susuga Hon Tuilaepa Fatialofa Auelua Sailele Malielegaoui: O le tulaga lea o le fesoasoani o faiaoga i le itu lea o le faamanino i vaega ia o lea ua oo atu i le maualuga ua amata ona malamalama tamaiti i le ituaiga course e alu e ave.

O le mea la e masani ona ou iloa i le sulufai mai o le tele o i latou i mea o interviews aua latou fuafuaga o latou polokalame i mea e aoao ai, o le tele lava

o mea ua ou iloa i lau fesili atu i se tamaitiiti aoga o le a lau mataupu lena e ave? Ae fai mai o au sa ou manao ou te alu e ave le a foi... le faa-Suetusi ae ua ou alu atu nei e le mafai ona ou avea ona e leai se isi na tau maia e tatau na ave lau Mathematics e compulsory. E faapena foi ona ou manao e ave lau faainisia ae na o lau mataupu lea na ave ae le i avea isi mataupu ia e manaomia

Lau Afioga i le Fofoga Fetalai e pei o le itu lena foi lele e tatau lava ona faataua ina ia silafia e faiaoga le mea lea e i ai mataupu e tatau ona ave, ina ia mafai ai ona oo le tamaitiiti i o e tauave le mea lea e manao i ai. O le itu la lena e taua e masani lava ona ou talanoa ai lava i aso la pe a oo mai mataupu ia o le taumafai o faiaoga ia faailoa i tamaiti, a e fia alu e fai lau BA ia so o se mataupu lava o au mataupu ia e ave ae a e alu loa e te faainisia pe e te alu e te faafomai pe e te alu e te suetusi, o mataupu nei e taua tele aemaise lava le Mathematics...

FOFOGA FETALAI: O lea ua maua le finagalo o le Taitai o le Itu Agai. Tulai mai lau Afioga i le Minisita mo Aoga.

Afioga Hon SEUULA IOANE: Lau Afioga i le Fofoga Fetalai, faafetai tele lava i le fautuaga a le Tatitai o le Itu Agai, ma o se vaega sili foi lea ona taua, o se faamanatu aoga foi lea mo faiaoga, o lo o faafogafoga mai aemaise o le Matagaluega. O se itu sili lea ona taua, o le vaega o le faalauiloa. E matuai ou faamaonia foi e au ia le fesoasoani mai a le Taitai o le Itu Agai i le vaega lea. I lenei taimi, ia o le auala lea lea ua faaaogaina, e matua faamalamalama lelei i tamaiti le auala sa'o e tatau ona ui ai ma taunuu i le taunuuga o lo o moomia e lana aoga.

I le tulaga faa-Komiti o Aoga, e sao lelei le saunoaga e pei foi lava ona agia i malae...

FOFOGA FETALAI: Ua ou vaelupeina le saunoaga a lau Afioga i le Minisita, talu ai o lea ua tatou oo i le tatou taimi manava e tusa ai o le tatou lafo. E i ai foi le manatu o le a faaauau le saunoaga a lau Afioga i le Minisita faapea foi le tulaga o tatou Lipoti ia e totoe i le vaiaso fou. A o lenei lava aso o lea ua tatou taunuu mai i le siui o tatou galuega mo lenei vaiaso.

E momoli atu lava le faafetai tele i le paia o le Maota i a outou Afioga foi I sui usufono mamalu aemaise foi o le faaso'a a le tatou Malo e tusa o tatou mataupu aemaise lava le taua o tatou Lipoti. O le mea lea e momoli atu ai le agaga faafetai o le Nofoa, malo le saunoaga faafetai foi mo le tofa faaali. O lea lava ua faafogafoga ma le toto'a le paia o le tatou Maota, ia malo lava mo le tatou Fono i lenei aso aemaise foi o lenei vaiaso. O le agaga lena e momoli atu ai le agaga faafetai a le Nofoa i lenei vaiaso ma a tatou galuega fai.

E faafetai foi i le tapuaiga a si o tatou atunuu, ia malo le tapuai mai a o faagasolo pea galuega a le tatou Fono. O le mea lea ae tatou te le i tolopo ou te talosaga atu i le sui usufono mamalu mo Gagaifomauga 2 e saunia se tatou tatalo.

*Na tolopo Taulumaga a le Fono Aoao Faitulafono i le itula e 1:10 i le
aoauli seia aulia le Aso Lua, 19 o Mati i le itula e 9:30 i le taeao.*